

无为集

杨杰

文硕阁

wenshuoge.com

目录

关于我们	3
提要	5
原序	6
卷一	7
卷二	11
卷三	14
卷四	18
卷五	22
卷六	27
卷七	33
卷八	40
卷九	44
卷十	49
卷十一	54
卷十二	61
卷十三	66
卷十四	71
卷十五	77

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部三

无为集 别集类二 【宋】

提要

【臣】等谨案无为集十五卷宋杨杰撰杰字次公无为军人因自号无为子嘉佑四年进士元丰中历官礼部员外郎出知润州除两江提点刑狱卒于官原序称侍讲杨先生盖其带职也杰及与欧阳修王安石苏轼游故其诗虽兴象未深而亦颇有规格其率易者近白居易其学为奇崛如送李辟疆之类者或偶近卢仝大致则仍元佑体也又及与胡瑗游故所学亦颇有根柢官太常时议典礼因革多所讨论集中如补正三礼图皇族服制图诸序以及禘祫明堂乐律诸奏皆有关于典制但其文才地稍弱边幅微狭耳集凡赋二卷诗五卷文八卷绍兴癸亥知无为军赵士?所编士?序云删除芜糵取有补于教化者若释道二家诗文则见诸别集今别集不传故张敦颐六朝事蹟载其雨花台诗一首王象之舆地纪胜载其净居寺诗一首潜说友咸淳临安志载其西湖参寥山房诗一首铁网珊瑚载其佛日山别长老弼公诗一首凡为僧作者今皆不见于集中也然第五卷中有书宝山寺壁一首第七卷中有题宝树院五松一首东峰白云院一首野寺一首第十卷中有圆同庵铭一首圆寂庵铭一首未免自乱其例又如铭五首入禰文赞亦禰文乃列诗中诗以古体律体分编而和谢判官宴南楼一首本拗体七言律诗而误入古诗编次尤为无绪至于魏诏君赞诏字盖避仁宗嫌名而次卷仍称魏徵君草堂校讐亦未尽善惟杰集自南渡以後湮没不传士?积两岁之力搜求编次使得复传至今其表章之功固亦不可尽没耳乾隆四十四年七月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

无为集原序

国家以文教作成海内近二百年主上绍开中兴息马论道者一纪於兹比诏有司修建太学盖以儒术粉饰治具渐磨士类未始须臾置也无为在淮右为小垒而多名士侍讲杨先生名杰字次公道号无为子实一时文人公自妙龄擢巍科以雄文妙赋醇德懿行得名於时中间立朝议礼乐因革人尤多之晚年尝奉使过泰山观日出於絶顶之上重九日赋诗举酒於华山莲花之峯继被诏从高丽僧统义天游前辈以谓皆以王事而得方外之乐故於瞿昙尤造理窟当时如大丞相王公内翰苏公悉印可之年七十而终生平所着文集湮没未传於世吁可惜也岁在重光作噩之冬士?误恩假守是邦服膺侍讲公之名旧矣视事之初首询公文於搢绅间岁余搜获不一公遣词典丽立意奥妙因删除其芜蕪取其有补於教化者编次成集将以为学者标准上佐吾君偃武修文之意不其伟欤其诗赋碑记杂文表啓共分为一十五卷若释道二家诗文则见诸别集云绍兴癸亥岁夏四月左朝请大夫知无为军兼管内劝农营田事赵士?谨序

卷一

钦定四库全书

无为集卷一 宋 杨杰 撰古律赋

归来堂赋【并序】

碧虚子陈景元字泰初初入道为右街録赐号真靖主中太一宫屡请归庐山朝廷不从大丞相舒公因真靖自言而题之云官身有吏责触事遇嫌猜野性难堪此庐山归去来无为子杨杰盖碧虚子之友也闻而叹曰昔靖节先生赋归去来以归庐山之阳且八百年矣其辞未亡罕有继其声者今大丞相因子之言而及之爱子之深也夫靖节远害於污俗真靖引分於治朝虽其去不同而所归则一迺追靖节遗韵而歌归去来以贻之庶亦自警云

归去来兮当太平之时胡不归宠难处而易辱乐或过而生悲田园荒兮不耨岁月流兮莫追非彼马而是是我指而非非黼黻烂兮眩吾目尘埃坳兮缁吾衣不收视以返听将安望乎希微胡为乎疲足孤轮与时竞奔行不顾乎夜漏往取愧乎晨门余闻有其善者善丧外其身者身存享不俟乎牛鼎酌不假乎象罇内苟适其志愿外何恤乎面顔一簞足以自养一枝得以自安车善行而无迹门善闭而无关动不离乎輜重超燕处乎荣观河汭流兮九曲丹伏链兮七还师不陈而坐胜勇无取乎桓桓归去来兮请从逍遥之游委天与之定分在道外以何求有名教之真乐絶世俗之妄忧玩几微於八索鉴福极於九畴齐物我而一致泛忘心之虚舟蹶遗舄於子乔接逸袂於浮丘砺吾齿而漱石清吾耳而枕流投空谷而响应憩长林而影休幽鸟翔而後集白云去而复留岁云暮矣何之叟击壤以为期舍我田而营它徒劳力於耘耔子胡不歌大丞相之诗脱官身之吏责庐山归去夫何疑

一鸛赋【雄鸛之物无有俦偶】

鸛也惟一物之至雄絶伦类於凡羽锐击搏於秋风一飞则冲得路昊穹之表独立不惧肯羣燕雀之中在气稟金於德为义力捕潜伏性锺猛鸛由耿介以寡合非沽激而自异虽曰鸛如其状孰并翱翔未尝乌合其羣曲从党比其或木落万壑云沈四陲我则助天地严凝之气乘风霜肃杀之时鼓双翼以直上摩九苍而俯窥兔纵狡以难遁狐虽妖而尽追义可去者力皆击之此天下以无双少而尤贵彼鸛鸟之累百多亦胡为目莹星攢爪刚鉤屈飞腾而雄压鹰隼擒猎而功高网罟宜乎孔融为表荐祢衡以兴辞邹阳上书諫吴王而托物大抵物之常者易其侣禽之异者难其俦故我不苟以合不旅而游孤飞得以奋其勇离羣不足为之忧惟我独清屈大夫之在楚出乎其类孔宣父之生周非不知生而飞鸣乐乎俦偶奈何彼不我类我匪其丑与其羣以无益孰若介然自守又何必提提若鸛斯之党止贼夫粮嚶嚶为黄鸟之鸣过求其友勿谓毛羽尔盛朋侪我无殊不知丹凤巢於阿阁大鹏迷於天隅子可类聚孰云德孤衆莫希踪鄙翩翩之六鵠举难接翼小泛泛之双鳬噫得其时则架於轩楹失其遇则巢於林藪将伸勇毅之志愿假英雄之手如欲禽异类而肃四郊於一鸛乎何有

歌雍彻祭赋【宗庙之祭歌雍以彻】

王享於祖礼终以时雍诗所以歌者祭器从而彻之周颂一章择作永言之用宗庙九献此为去饌之期成王以贵为一人祀兼七世岁或举於祠禴时或行於禘祫且谓尽物尽志者孝子之事有始有卒者圣人之制当取正声以尊先帝尸初以入必奏肆以迎尸祭及其终故歌雍而彻祭诗云至止肃肃有来雍雍祖考我格辟公我从有眉寿降祥之述节宰夫屏器之容篇本附於臣工咏而见意时因去其胙俎礼以为恭大抵诗不可废废之则阙祀不可久久之则?故我就灵宇以行事扬正音而後彻声闻於外且非客出之初孝事其先用作神归之节岂不以迁其祭器之谓彻播以人声之谓歌彻焉造其礼之备歌焉报其福之多以乐为用非雍则何是以小师教於瞽蒙职当讽诵君妇废其筯豆音应纯和惜哉周运否而大礼衰鲁权丧而陪臣侈乐奉祖庙义同天子虽能享献以自大莫测声诗之所以故孔子谓来助有二王之後始可讴谣奚取於三家之堂徒彰僭拟则知帝威穆穆上德颢颢诗曲尽於辞意礼告成於祖宗且异夫率诸侯以祀文颂陈清庙就方丘而祭地吕奏黄鍾愚尝因雍什之咏歌求诗人之微妙以为荐可用於广牡禘可行於太庙及其彻也又从而声之为万世之典要

周兼养老礼赋【兼修三代养老之礼】

古之养老礼莫如周兼三代之常法新一王之令猷尚文德以唱风典章尤盛奉耆年而兴教饮食参修昔自有虞讫於二代必重年德以均仁爱然而礼有质而有文事或兴而或废及周之治也古今之通制兼明而老者养之帝王之余风尽在大抵燕者虞之礼飧者夏之仪太牢而食有商所为天下未有遗年者周人修而兼用之就胶庠以致勤高年毕萃顺阴阳而为具异制同施莫不鼎俎豆筯牲牢酒醴考四代之异制萃一朝而为礼贵亲尚齿德爵富虽曰殊风黑衣素裳深燕缟杂然在体至如乐之作也六乐并用学之建也五学相参而况养庶老而明广爱事国叟而记高谈得不比前世而文盛优上寿以恩覃尊耆艾於每年时凡有七严豆觴於一日事徧其三故得风始朝廷化流穹壤春夏焉先飧而後燕秋冬焉先食而後飧舜禹汤之盛事得以追修乡国学之殊方各随所养向非歧昌之德盛而大武发之功肃而严成王治定姬公思兼则何以设珍具以完备致蒸民之仰瞻且异夫礼用四朝记者美鲁侯之盛文同三代史臣推汉德之炎则知兆民莫不亲其亲圣人惟能老其老推年龄以优事监古昔而顺考孔子曰周郁郁乎文哉未必不由於此道

不易之地家百畹赋【多少之限因地丰瘠】

岁不易者为美地地所美者善养禾惟君赐万民之限凡家无百畹之过田居三壤之先靡虚其种户给一?之广敢益而多尝闻田不授则仓廩虚食不足则民人夭故姬周平定畋畋颁分亿兆然而为土有肥饶出物有多少利而或偏仁何以表是故再变易者三其地补生育之所亏不代更者一其夫防兼并之所肇大抵王锡以土民耕以时衆者不当过而宠寡者不可使之饥必在计夫家之费辨黍稷之宜以中地给六人之用下田供五口之资凡同居之七者择上腴而赐之既殊休岁之畴常丰所利当限取农之数以授其私勿谓土之美也尔家不足与之耕勿谓齿之衆也其畹不宜使之简况夫任土之法待其政生齿已上书於版所养以之知

所给因而限异汉臣之代耨农不定居如杨子之?田世为常产盖夫瘠地之民劳以瘁沃野之俗逸而伸沃焉至多则太逸其俗瘠焉加少则大劳其民所以上上之田不广蒸蒸之利将均虚一岁而虚二年诚非此类为前朝而为後市数若相因然後再易之间八家所治内以公田奉於国外以余夫次其地犹有莱晦六遂之远得而优不夺农时数口之饥无以至惜哉运革三代权分七雄井地一变民田不同或负郭以无仰或连阡而自丰夫岂知辨野而颁遂师之典彝得正数室而制司徒之法则从中後之君鉴古是非随时沿革重孟子之经界鄙秦人之阡陌必也一丘甸以惠斯民损其丰而益其瘠

琴材赋【桐之良者可以作琴】

世有嘉木天锤至音抱良材而丽地俟哲匠以为琴中藏山水之声能参大乐未偶斧斤之手独秀乔林峰阳高峯龙门渊壑纯气所萃奇材以托宣情之具可以制闲邪之操因而作时未我与工未我度固全天质自为物以混成安得梓人为发音於寂寞百尺之木特生之桐落落耸干亭亭倚空无繁枝以示外蓄太和而在中时或裁成宜取羲黄之法人能抑按当移郑卫之风正声未扬识之盖寡庸目虽衆视之或舍犹藏器之哲士俟抡才之贤者虽云陶令非取意於弦间又恐吴民欲为薪於?下俄有智者过而器之且曰堪舆之秀岩谷之奇激风霰於冬序感雷霆於夏时足以道舜民之乐足以伸楚客之悲如玉在山秘珪璋之重器犹金藏鑛屈剑戟之雄姿毓质若然成功非我非锤山之玉兮其徽曷称非园客之丝兮其弦安可将致於用必陈於左然後欲天下之治者调其音而为表仪有君子之听焉平其心而无懈惰是材之所稟用难自彰巧之所述器无不良倪工匠见遗不之翦而不之斲枝柯虽茂胡为宫而胡为商别有艺薮俊髦儒林纲纪明堂之柱此其选巨川之舟此其拟材乎材乎岂独琴而已哉冀匠师之明所以

荀扬大醇而小疵赋

周汉运否荀扬教传虽曰醇之大者亦有疵之小焉皆命世以为文言非不粹与生知而较美道未能全尝闻人异禽鱼性锤天地全而稟者曰圣哲偏而得者曰贤智圣无不通贤有未至是以周公尼父率臻大道之醇荀况子云未免纖瑕之累蜀国宗匠齐王老师虽抱重器不逢盛时欲卷道以自处疾没世而无知由是简册其蕴琼瓊尔辞立大功於是矣未尽善者有之着书三十二篇义差而駁準易八十一首理失而醺至如论性之渊源谈道之极致或曰善恶一而混或曰理义皆其伪以礼义为伪则尧舜之法归乎诈以善恶相混则鯀禹之心何以异两贤於道择不精而语不详三子之间得其一而失其二又若对临武以问兵之术推子渊以希圣之徒远罪特愚於鼂错谈经私美於童乌是所谓珠不无類瑕无掩瑜虽无伤於大义实有累於名儒非倡道之子思将何以教美不臣之新室几近於诬向使亲承邹鲁之范模获偶渊骞而讨论然後善得以尽辨无不早数万言皆造修途千百世以为至宝杂乎其杂当殊太史之书醇乎其醇可拟孟轲之道奈何智有失虑人无全能一则晦名於天禄一则朽骨於兰陵俱有篆雕之杂难全粹美之称亦犹务涉猎者贾山醇儒不足悦纷华者子夏具体何曾噫荀也倡之於前扬也和之於後助诗书礼乐之化谨父子君臣之守斯文未丧大疵则否何韩愈氏重而责之盖责贤人也厚

无为集卷一

卷二

钦定四库全书

无爲集卷二 宋 杨杰 撰律赋

五六天地之中合赋【奇偶相合兹得中正】

朴散太极形分两仪天五得其中也地六从而合之数各有常法乾健而坤顺位皆处正并阴偶於阳奇圣人述易几微穷神高厚以谓地自二以至十天始一而终九数相协而运行义故得而悠久凡十有一毕乎道其道皆然惟五与六合而中以中为偶大抵一辟一阖五柔五刚八与三而契会四暨九以更相亦皆助生成於品彙广变化於无疆胡为数之五六独合体於中央盖夫共播日辰日有甲而辰有子协为声律声上宫而律上黄以中中其不中以正正其不正上全真宰之化下遂羣灵之命气降为味陶然覆载之间民受而生赋以中和之性是所谓象有滋滋有数穷则变变则通名数本堪舆之用交通为造化之功设在衆甫合夫大中二气始分类本从於三两五位相得独无党於初终後世商建五官周分六职经有五典士敦六德岂非取法於高卑然後鉴人之失得观而作服可为色以为章叙以成畴故曰福而曰极定数若此至神在兹既可推以造历又可准以揲蓍亦犹三五异位而同功孔子述卦爻之义一六共宗而在北扬雄明首赞之辞则知地数杂而不纯天数纯而不杂物理深蕴岁功周匝就五十有五之中五六谓之中合

导河积石赋【导河施功始於积石】

尧末遇水禹先导河俾义中邦之害必由积石之阿疏经渎之横流图成茂烈自金城之巨镇下决余波昔者世病怀襄人思降宅天命神圣力平川泽悼父绩之湮沦穷水源而疏辟且谓为民之患患莫大於洪河而治水之功功宜先於积石北越降水东踰大伾或穿地以湍悍或凿山之嶮巇流不自注功由此施昔也出图天尝授於羲氏兹焉兴复山必始於龙支况夫江已决於岷山洛已疏於熊耳矧此至大尤当谋始故我因水径道以山纲纪成其功於十三年历其地之三千里流未入於北海思是用劳势必就於西平勲由此起或谓禹绩虽大河源未穷殊不知出崑崙以湍激至蒲昌而会同皆在塞外或潜地中不为吾俗之所患故自此山而起功灵派至长葱岭于阗分为二圣人经始西倾朱圉在其东宜其海宇砥平勲庸日积治雍州以云备入冀都而建白播以过於大陆遇此洪波浮而至於龙门告其成绩有生乃粒无患其鱼大功可谓至矣後世何以加於亦犹引渭会泾由鸟鼠而基兆疏准入海自桐柏以权輿惜哉圣去邈辽民烦疏导既禹迹以湮塞徒汉歌之嗟悼胡不访名儒而修水官讲究夏书之奥

能赋可以为大夫赋【因物能赋可为大夫】

邻国交好古人重诗苟贤者之能赋故大夫之可为感物造端致二邦之协睦量材録德宜再

命以优推尝闻侯以贤封土由君胙邻邦不可以不睦臣职不宜乎不具将与谋事必求能赋且诗有六义能宣列国之诚而智效一官当预大夫之数盖夫善比而兴能箴以惩适四方则命无所辱善一言则邦从以兴既达古之风雅可为君之股肱诵三百之遗篇足彰才智宜五十而後爵以宠贤能及其受命出疆从君与会讲好以修睦兴利而除害我则文寄其心声闻於外扬四始以深谕为二邦之所赖是以班固之言图事谕志居先卢恺之议审官语诗为大则知道佐列辟尊为大夫禄不可过爵不可踰苟弗善其诗者岂足谓之贤乎必也鸿鴈应机可任归生之职羔裘善诵是为子产之徒况夫主意渊深国几丛脞托章什以後达非贤才而安可诗人之诗讽而诵义已精穷禄土之禄倍而兼材当克荷故圣人着育才之法正取士之因以谓官欲入者学於古夏所诵者弦於春就宵雅以肄三始从师氏及君子之能九进任陪臣後世诗道陵夷圣言湮郁义失风赋文烦黼黻学之不足以事君咏之不能乎托物然而位或至於公卿得无愧於簪绂

深衣可以为文武赋【服深衣者可為文武】

先王盖有法服古者谓之深衣惟圣贤之被体为文武以图徽中规矩而应权衡饰身以礼可摠相而治军旅助德而威尝闻服不妄成义有所主或专用於朝聘或止临於仕伍独此深衣创从先古约之以法母被土而母见肤服也在人可以文而可为武自天子之贵及庶人之卑所纯则异随时以为实善衣之亚者俟兼材而副之应六二爻得正义直方之节行三千礼尽干戈揖让之仪其布十有五升其裳十有二幅用之燕飧燕飧协用之师田师田肃念养老之虞氏昔尝在躬非学道之仲尼孰能称服大抵袞衣非不华也不得施於武黼裘非不威也不足用於文兼尔适用此其不羣既可次於六服又是率於三军设五法者圣人昭然有制持二柄於天下衣以成勲则知宾主昭其信诚师旅奋其刚果将者尚其右相者处其左则必服有制度然後人无懈惰兼高下短长之法义各有归参会同征伐之间施无不可故曰足以澣濯服而邃深可秉威而章化能安志以平心亦犹委貌者田猎之冠燕臣亦用鷩冕为飧射之服祭事其任後之人文不足以经邦武不足以卫社盛服虽被成能盖寡噫得无愧於深衣不贤而识其小者

继别为宗赋【君之别子继者为宗】

诸侯之庶谓之别别子之适谓之宗欲正世以相继恶羣心之异从惟君弟之初生法当似续致族人之仰事礼尽寅恭古者列侯先正其裔凡立厥次乃奠而世则斯子也君夫人以为母必有弟也卿大夫以同制宰乎尔族为始祖以优崇适曰大宗庶後昆之承继嗣既云立礼无不司如亲疏之升降昭穆之尊卑吉凶之容节昏冠之威仪族所为者吾皆主之职在成家绍一宗之本始代相纂服岂百世以迁移亦有自异国以肇臻与是邦而同列既处其土因谓之别亦自命其来裔嫡嫡相仍得兼综於小宗承承不絕大抵纲之举则网不得而乱表之正则影无从而欺欲家邑之咸义舍宗子以何为岂不见鲁国三桓立其长而统其下郑人七族建其本而率其支是知别者别也父别异於侯氏宗者尊也已尊优於胄子以纂其德以绍其美考之书无作室之诮在乎易尽克家之理彼於国而食采肇啓封疆此以族而得民嗣承纲纪夫然则仰继公子上尊国君正统得以全其贵同姓无以乱其羣且异夫三从事之以称宗易

於後世庶子贱而不为长载在前文孰若我在九族而贵之称五宗之上者无忝父德克宁家社故曰继其祖者传代不迁重其统也

藉田居少阳之地赋【天子之藉居地少阳】

位各有法藉无妄为实圣人之耕者宜少阳以居之建王社於田中因时以享就春方於国外顺气之施盖夫追养祖宗告天地酒齐以之荐粢盛以之备故凡建国之先必择为田之次然而制度不同方隅相异在周人之盛世尝处南郊至唐帝之昌期变居东位其意若曰地播生气时从少阳土因而沃物得而昌此既兴於王藉吾可实於神仓是故广辟农畴用作躬耕之所仰参乾道式当岁起之方时或晨见农祥日躔天庙则必朝士谨司徒之戒王者纳稷官之诏命载耜以勤劳率就田之壮少东作以礼自符虞帝之书坛置於郊何愧孔生之诮胡不居於北者恶其就严凝之地胡不居於西者恶其专肃杀之权就严凝则莫繁其稼专肃杀则徒事於田曷若我地乘於震气顺於天啓千亩於王畿壤称其奥遵五行之木德位据其偏是所谓假力於人名田为藉因先圣而有建非後王之能易礼殊西汉贾生不必献其言时在陶唐羲仲可以兼而宅夫然後天下之农不敢以怠诸侯之养不得而疏自我良畴之广据兹盛德之初亦犹王所处之明堂国阳以立臣所兴之小学宫左而居厥後政失纪纲君轻耒耜上既逐於晏逸下亦忘於耘耔宜国家举盛典以兴藉田继有唐之天子

无为集卷二

卷三

钦定四库全书

无为集卷三 宋 杨杰 撰古诗

幽谷吟上欧阳内翰

滁山插空望不足行信马蹄入幽谷生平未惯尘外游先酌寒溪洗尘目自疑身是武陵客误逐桃花迷水曲欲穷本始问岁月亭上雄文凿青玉意高语险测难到拂散白云再三读乃知造作自混沌山神固护宝藏匱路歧未许车马通白日苍烟走麋鹿一从紫府仙人来指出洞天三十六膏泽疏开不死泉栋梁养成岁寒木灵苗异草无根株摇荡清香过林麓峯峦围匝别是天天在山中成大畜先生之心此其象往行前言深蕴蓄议论吐为仁义辞文章散作生灵福默笑真工功未醇餽飮春风弄红绿聃云谷得一以盈以一能应无穷声千古万古声不尽先生得之为声名公之声名公之心日益远大日益深愚儒耳目所不及奋笔空成幽谷吟

辟雍砚上胡先生

娲皇锻链补天石天完余石人间掷掷向淮山山下溪千古万古无人识昼出白云笼九州夜吐长虹笼太极去年腊月谿水枯色夺江头数峯碧野夫采得琢为砚一画中规外方直方直端平象地形形壅水流流若壁拟法辟雍天子学不比顿宫一隅塞幸遇先生掌辟雍持以献诚安敢惜欲伐东山五大夫受爵非材链为墨欲乞湘妃血泪竿刮削除斑供简策欲就退之借毛颖同与先生记心画先生记之何所先探赜圣贤论六籍四时七政有未平愿述阴阳修律历要荒流蔡有未宾愿摅雄略操军檄辟雍之水流不穷先生之材无不通愿携此砚飞九穹圆润化笔扶天工

屏石谣赠郭功父

屏石屏石何嶄巖云初得自江之南沙埋土蚀几千载无人辨别嗟沈淹淨空居士物鉴精获之不贵黄金兼清泉洗涤露真璞野云凝结堆浓蓝巫峡山前暮雨霁参差十二挑峯尖比千骨朽心不朽通窍至今存四三蜂房蚁垤岂足数或疎或密争嵌嵌铜台古研置其下一片皴碧沈寒潭唐朝牛公嗜怪石取之不已其亦贪争如夫君一胜百得此自足无伤廉我尝乘醉到君家临风叩以苍玉簪其声清越合律吕簔簔可与大乐参何当琢磨中勾股列为编磬歌云咸问君考击荐郊庙孰若藏在青山庵

潜山行

昔年会稽探禹书探得六甲开山图图载潜南天柱山上侵霄汉下渊泉真人秘语世不传但见絶顶蒙云烟汉武射蛟浮九江舳舻千里来枞阳筑坛祈仙瞻杳茫茂陵桧柏空青苍石牛

一卧叱不起白鹿还归深洞里二月灵鹤有时来洞口桃花泛流水

歌白雪【二章】

歌白雪雪满龙沙暮冬月万里征人归未归一声晓角云中咽

歌白雪雪压樵夫樵担折行到都门门欲开十二玉楼歌未彻

勿去草

勿去草草无恶若比世俗俗浮薄君不见长安公卿家公卿盛时客如麻公卿去後门无车唯有芳草年年加又不见千里万里江湖滨触目凄凄无故人惟有芳草随车轮一日还旧居门前草先除草於主人实无负主人於草宜何如草无恶若比世俗俗浮薄

古行路

古行路古行路今人欲追古人去古人去远何可追後人视今如古时君不见去年春风去已久今年春风亦依旧

和酬子瞻内翰赠行长篇

云涛拥开沧海门鼓鼙万叠鸣江村仙翁引我峯顶望耳目震骇难穷源黄金铸鲸为酒樽桂浆透彻冰雪盆吴歌楚舞屏不用夹道青玉排云根经纶事业重家世昔闻父子今季昆九丹炼就鼎竈温刀圭足以齐乾坤我行欲别湖山去为我索笔书长言照乘不假明月珠自有光焰生轺轩

和章学士祈晴昭亭山

洪范八政一曰食民非稼穡胡为生江南风俗重圩垸岁遇丰稔仓箱盈嘉佑六年宛陵郡积月霖雨妨秋成昔之郁郁若云秀今也泛泛犹青萍岂惟百姓失所望将恐祭祀无粢盛集仙到郡为悯恻斋心命驾祈昭亭昭亭山下欲回辙太阳赫赫辉双旌老农乘时得刈获清风和气讴歌声我知夫子祷已久由有盛德通神明愿公移此福天下陰阳调燮归和羹

五云叟琴阁

朝望五云山暮望五云山望之欲去未得去抱琴登阁聊怡颜琴声喷潺湲意在山之泉琴声险欲絶意在山之巔五云之山不须到劝君但作五云操

凌歊台

大明七年暮冬月宋武南巡立双阙銮舆先幸凌歊台云中箫鼓轰春雷六龙一去杳无迹山花野鸟空相忆翠羽鸣鞭来不来景陵芳草年年碧

景云轩

南城城外山崔嵬景云轩上无尘埃双溪水落逐年急白发僧归何日来画屏满目万瓦合几人到此心如灰

恭轩

春雷惊起苍龙角春风摆开紫云箨扫断红尘不得来翠羽旌幢拥高阁高堂老人年八十朱衣省郎侍旁立追怀手植先大夫栽培灌溉何勤劬浓阴潜蔽芝兰径美实饱供鸾凤雏幽轩得名名曰恭见此还与桑梓同岂惟雪霜不可改年年高节摇清风

留春亭

古今春过知多少人不留春头白早君欲留春心可知为君更赋留春诗留春莫只留花住花老春风亦随去孰若芝兰香不歇亭下长如二三月

沧浪亭

沧浪之歌因屈平子美为立沧浪亭亭中学士逐日醉泽畔大夫千古醒醉醒今古彼自异苏诗不愧离骚经

送陈资道

有客抱荆璞不琢贵其质兢兢三十年常恐有坠失所欲价百倍今也十之一勿患知者难光彩已四出

古监谣

铁监埋重泉知经几寒暑山翁筑春田得之南涧浒磨刮追光辉云卷秋蟾吐敛衽正面视历落露心府坏垣试一照阴灵吼风雨我欲匣此监西上献人主不愿监其监愿君监於古桀纣不监古基业倾汤禹幽厉不监古纲纪颓文武吾皇宝其监清风塞寰宇

豫章行送周裕

君不见南浦亭前草送人千里道一番膏雨一番青不顾王孙江外老又不见丰城劒埋尘土间几年秋水澄波澜夜深直气射牛斗变化风雷头角寒丈夫穷通有时有满腹诗书满樽酒

行行三月到扬州故人莫笑麻衣旧

和穆父待制蓬莱观雪

戊辰岁历长两春一逢腊上瑞兆丰年同云弥六合初如天马来奔入银河蹋梁苑客後至郢楼曲难答锦绣方还里罇罍喜开合光照孙康书寒恤袁安榻但爱川陆平不问瑶珉杂扁舟欲泛剡凜气若浮渌龙图屡烹试风腋顿爽飒明月交清辉绛笼不燃蜡

赠朱伯原

张籍心不盲何为盲於目伯原道不病今也病在足及第二十年未识太仓粟乐圃德义重可敌万锺禄世味觉幻梦老把华严读九会发渊微赞文焕珠玉洞庭秋月澄吴门春草绿香海泛虚舟不慑鱼龙触

凌云行

淮国耕钓夫素嗜山川乐补吏来盱江潜解蓝绶缚独上凌云亭青梯入寥廓万象富观览面面峻岩壑天风袭衣襟彩霞半空落仙家鸡犬鸣惊起巢松鹤胜游後时萍梗念飘泊回首顾人间红尘满城郭

无为集卷三

卷四

钦定四库全书

无为集卷四 宋 杨杰 撰古诗

丰湖歌

惠州风土隔世埃使我南望长徘徊昔年霹雳轰蓬莱六鳌踉跄海面开一峯崢嶸九霄落万里怒涛推拥来至今浮在罗山畔玉阁石梁插天半世人可见莫可登雪栈云梯知几层近闻更有丰湖好环匝亭台映洲岛野叟忘机鸥鹭闲寒潭无浪蛟龙老云归洞府月满湾客卷纶车鱼在藻白玉抽苗万盖圆翠光期压王孙草天高日暖荔枝香风撼一川红玛瑙主人丹鼎飞金虎丰湖无根岂能住一日地轴如走丸随逐浮山还旧处

谢公约惠墨竹图

幽人渍墨写成竹变化琅玕作玄玉公约赠我两大轴不比丹青凡草木六月都城苦炎燠车马纷纷正驰逐曲台官冷昼掩关净扫虚堂展霜幅帘间忽有微风来不动纖枝清满屋忆得扁舟载雪时曾寄会稽江上宿

和谢判官宴南楼

邂逅南轩须水濱名言间发兰桂芬道义相投有余乐宾主交照无繁文忠臣寤寐在北阙古风歌咏追南薰出关不觉行役苦举头时见孤飞云

送李辟疆

李辟疆濡须别我游池阳别後不得信不觉青女三飞霜每见世俗仇讎盃觴桎梏文章忆君酒怪吟狂往往登高岗但见大江水茫茫九华峯青苍使我增悲伤明堂礼後一百二十日忽骑蹇驴访我来池阳倒覆我巾箱得我弊藁数十张索我狂书八九行告我明日游帝鄉我知利民术君心十年藏青云一万里此去高翱翔

白月池

凿池待明月池成月自来一从幽人去明月来几回乳窦走龙蛇断崖激琼瓊安得藉磐石泛我癭木杯

留题张尉隐斋

小隐隐林藪大隐隐朝市市朝心隐不隐身山林未必忘名利夜来月明竹声细隐斋主人留客醉四更客未醒主人促车骑客笑主人劳不顾隐之意君不见梅福曾作尉民官庄周亦为漆园吏

酒隐园

小隐隐山林大隐隐城郭城郭多纷嚣山林苦淡薄不如隐於酒适意自斟酌屈原不能饮独醒较清浊扬雄虽愿隐载醪无适莫吏部瓮下卧其隐可愧忤翰林市上眠其隐太落拓孰若畸翁园醺酣得大乐风暖凤凰集霜重梧桐落长啸待明月明月出林薄倚杖傲浮云浮云度寥廓虽近市朝路不为名利缚知我尚幽胜赋诗豫期约愿言醉乡游一驾东飞鹤上池沃瑶浆冲气溢金杓当知隐君子志不在糟粕

及第东归逢元举

与君去岁金陵游七月十日离楚州酒阑浩歌古亭下白日雷雨催行舟片帆乘风破险浪冉冉飞过芦花洲我时幸预鳌头荐君以才术公卿留人生聚散散或聚忽忽今会如萍浮君行何以赠君别庄鹏九万抟高秋

丞相王舒公赞

天子元老坐而论道赫赫具瞻傅岩惟肖

都尉王居士赞

珠圆而明玉泽而温监莹澈而絶尘芝秀发而非根曼殊沙华梅檀香芬晦堂路险大开施门西江水深一口平吞谁知威音已前正是王老师孙

三江鲁府君赞

三江府君有德有文善政及物陰功惠民异木连理双芝共根诗助风教道传子孙斯人一去莫可见万里西山空白云

治平三年秋七月当涂郭功父招无为杨次公会於环峯时五云叟陈德孚以诗寄吾二人因联句酬之

空山坐寥落正马邀俊哲入门肆高谈清风扫烦热【功父】忆昔治平年姑熟溪上别岁时激箭急倏忽三十月【次公】读书非少锐欲论先卷舌归田殊未成累累逐羈縲【功父】孰谓赵魏老不能佐滕薛由来岁大寒松栢见孤节【次公】朋心久愈至忠规补残缺儿童喜父执飮餽成罗列【功父】壶有玉泉酒庖有冰裙鼈野芡剖珠玑秋瓜咀霜雪【次公】

新粳刈且春香炊软三浙放七聊醉饱百忧旋磨灭【功父】升平击尧壤险怪探禹穴吐气直虹霓落笔淬金铁【次公】词源河汉翻俯视堤防决文章贵天成追琢讥窜窃【功父】抵掌万古事高下争螳垤挹酌华阳水荡涤尘土咽【次公】吾心了何染本理忘巧拙圣贤久不作情伪愈分别【功父】竹阴卧片石浩歌声欲阕山童脩及门喜音屈高洁【次公】传闻脱世累天境妙搜抉疎帘卷危阁九峯青巒嶂【功父】吟余琴一弄铿然响环玦老鹤不敢鸣十里飞云絶【次公】次公君素交嗟予尚契濶畴能枉篮舆相期出寥沆【功父】崔仲岳隐居松江以丹白黑饰舟曰鹤舟括苍周子韶无为杨次公治平三年夏六月会仲岳於繁昌蓬莱亭勉其罢鹤舟以应书席上联句送之

且就飞龙榜休登白鹤舟【子韶】陇书方劝驾阆苑莫回头【次公】丹顶归沧海霜翎擲素秋【子韶】海鹏期变化仙骥任沈浮【次公】烟月闲三岛功名重五侯须知驰凤诏便是钓鳌钩【子韶】已得冲天便无思击楫游【次公】楚醪铿逸韵湘瑟助冥搜【子韶】南浦成春别北山空夜愁九臯闻象魏一叶寄汀洲【次公】世气骑风虎机心走海鸥【子韶】昔年嗟鷁退今日并麟游【次公】八月仙槎驶千龄圣运优市朝真大隐箕颍谩清流【子韶】鼓枻虽渔父乘桴笑仲由片帆从此卷旧艤亦应留【次公】冠佩重华国莺花四皓楼雄文高鴈塔大醉忆蓬丘【子韶】勲若书青史幢须建碧油兰橈好重举乘取上扬州【次公】

送沈汉卿拜母墓【效孟体】

慈母塚前柏孝子眼中血根在叶长青恩深泪难歇二月黄莺鸣一路玄猿咽

牛渚矶修水府祠【并序】

牛渚矶在太平州之北里即温峤燃犀之所也石岸险隘江流湍激颇为舟楫之害中有水府祠南唐保大年封其神以王号国朝祥符中从而加封舟人将过之必先陆走具牲币以祷焉及庆历初朝命开新河於矶後而获安济则礼事稍损祠宇多敝嘉佑七年章太守命修之杰因赋之且警来者

牛渚矶大江汹汹山险巖舟人欲渡不敢渡烹牲投简先祷祈自从疏派得安济祷者渐疎祠宇隳我闻鬼神若君子不以风涛为福威吁嗟人心自险易昔也兢兢今也违太守修祠岂无意寄语安者毋忘危

至游堂

人孰不好游外物常求备佳胜穷山海纷华乐朝市不知务内观未得游之至达士靡窥牖天道已昭炽六合极周流万化览要会潇洒须川守名堂慕高致政清民讼简庭木交苍翠间关林鸟鸣跳跃池鱼戏逍遥成咏歌吏隐欣得地视听与人同所适与人异翻笑列御寇不出终身愧吾亦爱吾庐岂独壶丘氏

无为集卷四

卷五

<集部,别集类,北宋建隆至靖康,无为集>

钦定四库全书

无为集卷五 宋 杨杰 撰律诗

元会

岁令春为首人君德体元宸居太极殿星拱紫微垣历运千龄协梯航万里奔同时稟正朔大
号一乾坤谋野曾繇蓂沿波未涤源典章归独断期会肃常尊礼乐谐虞舜师儒陋叔孙曲台
司肄习执法纠譴誼旧史精穷讨非经不引援殊疆今辐辏古辙此还辕陞峻黄麾建旗张直
盖屯地图包海画庭燎彻宵燔班位分贤戚铜玕定晓昏仙盘凝沆瀣禁漏泻潺湲呼旦传鸡
唱填街列虎贲六军衣锦绣八骏轡璚璠綬采由官别冠梁以秩论国容修卤簿武事设囊鞬
鼓吹依宫架关扃辟路门簾文雕猛鸷路饰绩蟠蜿牙瑑中严版珠联告止旛金牀置符宝土
贡杂瑶琨百辟稽名实诸王固屏藩立墀隆辅弼述职简要番省寺兴颓敝材能慎选抡班齐
序鸾鹭仗转駘鲸鲲圭镇唐仪易袍纱汉制存鞘鸣龙扇合帘卷兽烟喷陟降天威重顒昂玉
色温泰平安可象造化本何言悦豫阴阳盛渊深宇宙吞江河宗渤海山岳望崑崙牋奏龟麟
应书先稼穡繁历阶臣委佩宣诏使临轩进有称觴庆初无解劒烦南山赋周雅北斗揖尧樽
济济华夷拚雍雍信义懃登歌彤瑞物旅舞异梨园翠凤闻箫集朱熊负案蹲四清备钟磬二
律下匏坝宠锡需云泽均沾湛露恩拜吟三夏享饗盛九牢飧受觶充醇醴加肴饫熟躡攀勤
供鴈雉羞洁具苹蘩布治从丹阙怀仁感陆浑祥光腾广坐和气冒陈根蓬岛风长习扶桑日
向暄前楹秀芝草阿阁长鷦鷯社稷生灵福邦家政教敦年年朝溥率基业壮中原

景灵宫

仙宗司玉历帝系出璇霄功业超千载威灵会六朝圣孙严子事神武耀文昭游渭衣冠在违
顔咫尺遥奉安先上衮守卫肃中貂重屋华天篆棨星屏俗器麾幢迎宝辇象魏起祥飈霞醴
充流瓊芝房陋炳萧降升瞻穆穆警欵听寥寥复道悲追汉灵旗想伐辽荐新随四孟观德序
三昭养慕谐虞氏声明格有苗庭分五行舞乐奏九成箫将相旌遗烈松筠鉴後雕肖巖非特
说画阁岂惟乔寰海名王聚江湖王气销基图传久大宫阙壮嶢嶢皇泽弥霏霏羣生荷益饶
侍祠叨旅进赓颂仰材翘孝治光青史琼瑶合瑑雕

皇帝朝献景灵宫天元殿门有灵芝为瑞时备员博士前道圣驾得预瞻仰获缀贺班赋诗上
进

原庙躬朝献高真监孝思僊源传宝历乾户产金芝火德资生毓天元固本支灵华依玉宇瑞
物陋铜池大庆同荣茂甘泉杀等夷洪休均草木嘉应在仁慈舜举重瞳目尧开八采眉祥光

斋殿照喜气辅臣知三秀书图牒千龄保福禧愿如郊祀乐志府播声诗

过黄陵庙

黄陵二妃庙客过动愁颜湘水有时尽帝车何日还血斑千亩竹魂断九疑山欲问苍梧事白云生栋间

李翰林祠

半醒半醉游南国浮利浮名重一毛天上星精锺太白天间文格埒风骚仙翁曾换金龟酒老笔空传紫兔毫姑熟遗音千古在长随春色满林皋

简寂陆先生祠

紫霄峰下陆先生飞出红尘鹤羽轻高第不知朝玉阙旧山重喜见霓旌斗坛石凝云三尺丹井泉寒月一泓昨夜全家宿琳馆尚疑鸡犬有遗声

延陵季子庙

战国干戈礼义隳延陵高节救周衰当时若嗣诸侯统後世谁传十字碑生死不欺留劒约兴亡都在审音知名儒如欲修前史列传应须次伯夷

和伯瞻郎中登郡城北楼

楼上高吟思入微白云随步拂人衣几行塞鴈断不断千里客帆归未归仓廩稻粱知国富弟兄疆境乐家肥望中孰谓长安远路去江南只数圻

和程太卿雨中登物华楼

泽国连朝雨春山半夜雷登楼寒食近隔岸画屏开沙鸟飞还止渔舟去复来年年南浦草相伴绿波回

夏日天庆观水阁

锦绣堤边曲径通登临不觉俗愁空声喧枕簟芭蕉雨香扑罽毼菡萏风池景信皆尘外物道家疑在画图中南楼有客频回首应认蓬莱第几宫

题具区阁

阁占具区泽登临万象奇中秋月明夜平旦日生时云淡雪千里水澄天四垂渔舟何处在
一笛顺风吹

子隐台

平西义战几百载江左空遗子隐台乡俗尚传三害去地基曾见六朝来人随逝水年年远山
似屏风面面开谁与宜兴寻旧宅至今藏在白云堆

余卿新第

章水营居不日成皇华诗价敌连城檐牙雨过千鳞碧池面风开一监清修竹短墙儒者宅白
头青眼故人情莫忧退处生涯薄鹤引新雏遶砌行

和酬子中舍人

待次归来偃月城邻公笑我拙谋生藏书有穴期传世负郭无田不问耕朝市风波谁弄险江
湖鱼鸟自忘情吴门建第君何晚水阁山斋到便成

荣老堂

知节能全节辞荣老更荣闲居玩图史得意傲公卿自有琴藏匣何须金满籝子孙承义训力
学重清名

和穆父待制竹堂

会稽风土竹相宜傍竹为堂趣自奇内史旧居经几代此君高节似当时林无暑气客频到笋
过邻墙僧不知莫夹桃花引蜂蝶实成须与凤凰期

清轩

湖水山一色湖山屏四围无风自潇洒有月更光辉洗涤尘埃静消磨暑气微平生方外乐到
此欲忘归浮玉僧建亭蒜山之顶丹阳新旧太守林子中杨次公首登之因名二翁亭

来陪杖屦蹑孤峯故老旁观叹二翁海上波平千里白江东兵壮万旗红云开云合山头月潮
落潮生渡口风须约蒙庄老仙客凭栏直下看龙宫

折柳亭和林子中

行人折柳楚江头帆去帆来几日休飞絮不知漂泊苦展眉谁顾别离愁五株彭泽清风在千

里隋堤胜气浮莫惜一枝临水赠使君将解济川舟

淮阴千金亭

良将未得用几人能赏音恩难忘一饭报肯惜千金旧俗喜出胯後时空愧心至今重风义庙食配淮阴

玩鞭亭

晋祚衰微鼎欲迁梦惊营垒日回旋强臣驾馭无长策追骑留连有宝鞭险捋虎须曾幸免怒形蜂目亦徒然谁能杖箠平凶乱千古荒城鏤暮烟

同浩然正叔赋夏英公宅延春亭得登字

九衢尘土袞车声一到延春世虑澄暖律解教寒谷变熙台还许衆人登兰生旧砌香连续花入名园价益增莫笑冷官联骑过长安城里有谁曾

和晚登故丰门

故丰门近子真家楼上高吟水齿牙帆似马来思杜牧劒为龙去忆张华沟还故道穿城角沙涨平川压水涯江外西山衔落日几重苍翠衬余霞

张司封泗上春运

经纶才术致唐虞暂出东南摠转输德教久为诸郡法国家何止十年储清风继世留淮甸和气先春入汴渠不日召归调鼎鼐一封天上紫泥书

游北山

今古忙忙利禄间几人能此叩松关猿惊鹤怨不知处虎踞龙蟠空见山芳草路随流水远老僧心共白云闲淮南旧隐抛离久一诵移文一愧顔

书宝山寺壁

片帆曾渡谢家洲屈指於今十九秋沙鸟重归迷战岛钓矶空在忆浮丘苍顔白发生新感疎竹清风伴隼游借问蓬莱山上月停杯还记故人不

游宝林招李簿梅尉

东郭乞求闻晓鸡篮舆乘兴过泾谿水开波面白玉碎雪压竹梢青凤低仙去空留链丹井境
清疑有辟尘犀子真太白曾孙在飞棹何妨到水西

御试求遗书於天下

炎德侔三代文章叹烬余千金期重赏诸郡购遗书东鲁藏经出西秦挟律除儒生搜简毕謁
者骛轩车阙史修兰省亡诗补石渠愿观新四部清禁直明庐

无为集卷五

卷六

钦定四库全书

无为集卷六 宋 杨杰 撰

律诗

送张令同年赴岭南

滕王阁上正持盃候吏先期过岭来
泽国暂抛三径菊春风须寄一枝梅
昔年身到仁宗殿同日鳞惊禹穴雷
万里青云有前约莫因蓝绶叹尘埃

刘纯之以便亲请还蜀

通守临川郡家山梦翠微
愿辞灵运史欲着老莱衣
万事樽前尽片心天外归
金乌伴征棹日向西飞

赋梅送黄庭方

子行何所赠赠子一枝梅
长共雪霜约故先桃李开
清香隔年在和气引春回
上国人相问为言南岭来

赠朱汉臣先生

德义轻轩冕有谁知
所存清风满淮国
高节老巢门孝友敦兄弟
诗书教子孙何当对明月
林下接君言

送陈成伯学士知湖州

扬舲初出禁城东
夹岸桃花蕊正红
紫绶朱轡金马客
清风明月水晶宫
昼衣始信归乡贵
夜鹤从教恨帐空
政暇笙歌应鼎沸
诗坛不用苦争功

送姜厚兄弟

之子别庭闱乡心夜夜飞
芝兰经岁老鸿鴈傍春归
芳草随征棹和风上彩衣
鸣榔声渐远月满钓鱼矶

送许常

连年去乡国从我赴南官一日学不废双亲心自宽朝廷尚公正场屋进孤寒去去勿陨获青
云翔羽翰

和朝回【二首】

官闲无谒禁朝退自宾稀开卷逢先觉忘言接上机百千三昧悟四十九年非老矣陶彭泽浩
歌胡不归气平无病恼心定觉身闲礼局容尸素仙科玷润删马弩犹勉驾鸟倦合知还旧隐
庐山下蓬茅屋数间

和酬致政朱殿丞

挂冠清世咏归田舟纵江湖养浩然水底病龙思致雨树头老鹤懒冲天诗因社友编三百酒
为春风费十千今古辞荣人不少惟君知足最当年

再和

诗将曾持造化权何须功业勒燕然生涯书外都无物兴味壶中别有天君解扁舟帆五两我
慙佳客履三千吾皇贵老多优赐好乞湖山不计年

再和

君赋江山数十篇人疑吟苦鬓皤然洞庭有浪寒欺昼太华无云翠插天鸢鸟懦飞徒累百疲
兵重战必当千席间莫讶赓酬速诗债从来笑隔年

陈氏得开元佛殿梁材斲为琴传三世矣而归於太常少卿盛诲之请予赋焉

佛屋良材度中琴调弦安轸布徽金平时已入栋梁用终古更传山水音陈氏得为三世宝啓
期无负一生心太常密补岩廊化歌咏南风惠泽深

昼锦堂

功成身退正康强凭轼归来昼锦光门外节旄交画戟境中桑梓间甘棠两朝将相经纶业千
古弦歌礼义乡父老未劳思再见圣君方眷股肱良

游藉田

池馆连云昼掩扉晴烟冉冉日晖晖黄鹂映叶不肯去翠鸟得鱼还自飞禾秀天田葱犗卧花
开仙苑粉墙围白莲径里归来晚风送余香欲染衣

和酬赤松庄陈天贶

花压栏干木插天不知经始自何年为怜水石留终日漫拂莓苔写数篇
笼碧裁纱非我望梯云名集自家传气蒸波撼多才思应笑襄阳孟浩然

过鸿沟

楚汉区区别土疆谁知盛德胜兵强乾坤混一归真主郡国平分亦假王
地底泉源通汜水道旁碑石属荥阳如今四海都无外农入春田失战场

和谢圣藻游锦川

锦川亭上雨霏微太守斋航卷画旗步入名园莺惯见歌随流水鹭惊飞
凭高自有千峯聚饮剧方知万事非却恐丹阳赴官去此心当共白云归

藉田集议【以姓为韵】

甸师经始遇金穰禁籞清樽合奉常千亩方田开帝籍四时和气聚神仓
青坛改卜先农兆曲水交流上巳觴欲识汉家林苑富融融春泽浸长杨

舟泊太湖

区区朝市逐纷华不信湖心有海槎八十丈虹寒卧影一千顷玉碧无瑕
古今风月归诗客多少蓴鲈属酒家安得扁舟如范蠡烟波深处卜生涯

汝直松斋

伊阙十五里唐朝三百年岁寒林木在王氏子孙传门有登龙客风生饮虎泉
丹方齐代刻龕像魏时镌居士山长对郎君谷已迁塔巍花缭绕溪净竹婵娟
木记空陈迹烽台息旧烟陆浑平犷俗八节稳渔船嗣絶伤宫傳碑亡叹郑
石楼延客醉天竺伴僧禅寓目鸣銮地追怀夺锦篇白云最深处约我咏归田

默斋

喧喧人事何穷燕坐深斋孰与同道义优游言象外利名分付是非中
红尘无路到真境幽鸟有时啼晚风此意只应陶令会北窗琴在七弦空

赠冯扬州

天下无双士淮南第一州文章老元帅节义古诸侯路稳归黄阁功成建碧油九重致尧舜四海望伊周楚甸供吟笔吴兵赖坐筹风云生鷁首蛟蜃怯龙头有士依余茆干时愧拙谋沧溟波浪险愿借钓鳌钩

上知郡宋大卿

县弩曾陪竹马迎清风千里畏神明三朝史荣推循吏九寺官班重正卿道气养成髭转黑民情照尽法从轻异时归去黄金阙留得甘棠岁岁荣

答宗臣佳章

幽闲外世缘白日抱琴眠诗就多惊俗楼居半是仙竹牀斜倚杖薜壁倒垂鞭翻笑红尘客马头缰轡牵

和刘景文路分成考

新春书一考旧学惜三余弗厌诗情淡从教世味疎清时闲将帅长日玩图书爱我锦溪月约来相伴居

和李义山盘豆馆藁芦有感

盘豆苍珉刻旧吟清风自可涤烦襟庭芦邂逅开青眼泽国归投是素心乡梦不知家远近世涂休问迹升沈阳春一曲一樽酒遮莫秋声四面砧

秀溪寒食

十里喧阗锦绣川秋千人健趁飞鸢花明柳暗丹青国日薄云浓水墨天游女践成芳草径画船冲散碧溪烟武陵谩说桃源好屈指如今几百年

夜泊偶书

过得重湖日已斜相依渔艇宿蒹葭故园水面一千里明月渡头三四家客路漂流身似梗世途纷冗事如麻却欣归去逢寒食醉倒春风烂漫花

和钱越州穆赠惠州弟

燕集蓬山雨过凉湖光何独负知章万家桃李春风国两郡旌旄昼锦乡和乐岂烦鸣管磬醺酣非止为杯觞遥应大庾岭头去南北枝间梅子黄

和酥花二章

姑射山中冰雪肤造花凭仗箸头酥生成自有神仙术点化亦同天地炉全用阴功催气候不从凡土起根株顿教寒处萌春物邹律回阳得似无

一盘花卉鬪工夫孰谓真酥胜假酥白石萌芽生玉种寒林枝干守丹炉缕金滴粉休随俗翦彩粘膏近守株翻忆岭头梅带雪使归曾得信音无

赵左丞画像

洪学祠堂写六贤左丞功业最居先仪形已在凌烟阁岂独丹青一郡传

魏徵君赞

天子诏不起少微星转明寥寥千载後富贵在清名

赵宾客生日

人间爵禄颂公难自有家传一品官已亥年生逢已亥从今甲子别开端

老子度关图送张会稽为壽

秘藏函谷关中子持赠蓬莱阁上仙愿得髭须如此老却教龟鹤美长年

无为子六年官太常江上耆老思得一见门人求京师名笔传写以归因题之云

江南江北白云堆试共幽人一展开向道无为老居士拟归先遣化身来

申国吕公挽词

讣闻孰不泪盈巾宝监云亡社稷臣帝猎渭滨先得吕神还崧岳旧生申默调一气归元鼎坐致羣伦入大钧孤贱无能报知遇文章曾许继前人

资政少保章简公挽词

中道立不倚大哉王者言文章曾润色功业在调元衮绣光闾里图书遗子孙悲风起吴国千载凤凰原

得安肃顏舅书再成哀词

安肃书来倍痛伤
痛伤穷苦盛时亡
三千蝉蜕人何处
十载龙山梦一场
我愧动心非孟子
谁能鼓缶学蒙庄
夜台难寄登科信
泪滴春衫吊夕阳

天章俞待制挽诗三首

材与时相会
声华孰可攀
东堂升秘籍
内阁叙清班
余庆千年远
浮生一梦还
故乡闻讣日
云黯四明山
熙宁治百川
献议辟民田
平昔不毛地
于今大有年
至忠期报国
上策在安边
士论追贤业
临风一泫然
节制当方面
恩威号令明
黠羌知効顺
叛俗乞归耕
一夕流星陨
中年逝水倾
祠堂严岁享
耆旧致精诚

无为集卷六

卷七

钦定四库全书

无为集卷七 宋 杨杰 撰絕句

庐山五笑【并序】

无为子愿游庐山者二十年矣治平三年冬赴官江西舟过汇泽乃得侍亲携幼搯奇寻胜以偿素望一宿山间而去马上不觉自笑顾一已无足笑故广之而成庐山五笑云

远师

我笑东林寺孤高远法师种莲招社客平地凿成池

陶渊明

我笑陶彭泽闻钟暗皱眉篮輿急回去已是出山迟

陆先生

我笑陆简寂修真脱世埃九霄一飞去重入旧山来

开先招老

我笑开先老家风双剑高云间本无事拭目看金毛

无为子

我笑无为子游山学古人匡庐不能住骑马入红尘

赞皇公祠

梦到瀛洲夜觉来江上秋一身投絕域千古吊穷愁

魏徵君草堂

召伯甘棠国东郊处士家百年三世隐泉石当生涯

登南楼

此楼此景他州无山川形势吞三吴唯凭诗老写奇胜纵有画笔难工夫

此楼此景他州无栏干倚遍还踌躇主人有酒且共醉骊歌不用催行车

此楼此景他州无天高水濶连平芜綠杨深处杏花发日暖数声山鷓鴣

怀黄梅三阁【并序】

黄梅县墙西有池多鱼旧政或捕为乐自余为令戒勿取其後乃为放生池池上三阁曰钓阁吟阁醉阁公暇与客登之颇有佳趣因葛令赴官作三章写其怀云

钓阁

屏去竿头饵非唯用直鉤我来鱼不避鱼信我无求

吟阁

二十年前令曾来阁上吟如今头已白诗有壮时心

醉阁

江边醉长官昔慕陶彭泽未赋归去来於今有惭色

题陈令壁

地胜江山国风清令尹家酒阑寒食夜月上海棠花

清轩

清轩直下压秦淮淮是秦皇厌胜开千古兴亡无问处好风唯共月明来

水月轩

湛碧一泓泉中涵千古月不比天上轮三五有盈缺

徐贤亭偶成

湖外青山在湖边人不归古今无问处幽鸟下渔矶

遥碧亭

幽鸟无心去又还迢迢湖水出东关暮云留恋不飞动添得一重山外山

斗野亭

八月风高浪渺弥僊公醉倚海槎枝夜深曾傍亭边过亭上主人知不知

送陈令归无为

楚水漾轻碧楚花飞乱红故人故乡去半雨半晴中

刘彦辅乞侍养

变化未随雷焕剑晨昏愿服老莱衣山堂大饮不敢醉应恐倚门人望归

别安廷老

山色浅深烟霭里客情去住别离中临川聚会应不久明日扁舟乘便风

和黄倅别诸公【二首】

豫溪春雨江湖平苍壁洲边春草生吏民出郭自归去草间流水随君行

垂杨陰里系行舟隔岸数声黄栗留异日相逢定何处莫辞春蚁一杯浮

钓矶怀古十章【并序】

治平三年冬十月一日舣舟江上与二三子登古钓矶慨然长望有客问曰古之善钓者可得闻欤曰吕望任公子詹何鲁人庄周琴高陵阳子明严光左慈刘遗民皆古之善钓者也吕望钓鱼磻溪有志於天下也任公子钓於会稽以大取其大也詹何钓於南国以寡获其多也鲁人钓於洙泗华过其实也庄周钓於濮静而保真自适也琴高钓於涇仙而隐也子明钓於旋溪爱物而有获也严光钓於东阳退而自适也左慈钓於魏乐其术也遗民钓於江东知时也十子之钓或取或舍或进或退所适不同同归於钓唯至神为能以不同同之以不钓钓之使各任其所适焉夫有志於天下者可与共治以大取大者可与议远以寡获多者可与议要华过其实者可与救质保真自适者可与救贪知时者可与议变爱物者可与议取仙者术者可与游乎方外故物物各遂其性人人各尽其材来者纳而勿拒往者纵而勿追得者吾得之失

者我亦得之然後出入六合游泳乎太和之域非天下之至神其孰能与於此哉乘风将行乃赋钓矶怀古十章云

吕望

举世无人用直鉤直鉤到底是良谋孟津再掷磻溪饵八百诸侯尽爱周

任公子

机深谁及任公子澗水苍梧饱巨鳞鯢鮓不吞鉤上牯一年笑杀海边人

詹何

五年南国钓烟波妙手从来所得多鱼引盈车竿不挠几人施舍似詹何

鲁人

好钓无如鲁国人暗投香桂饵游鳞谁知浅水鱼贪食不待金鉤翡翠纶

庄周

谩投香饵试纖鳞楚使徒来濮水滨莫讶持竿不相顾顾君还是上鉤人

琴高

不钓浮名不钓鱼一纶鉤线卷还舒九霄控鲤无人识谁道纖鳞是脍余

陵阳子明

旋溪不杀真龙子学道三年蹶太虚今古报恩人亦有不知谁有腹中书

左慈

香饵轻投一席间鲈鱼泼泼跃铜盘曹公不悟神仙术徒整金鉤把钓竿

严光

狂奴肯顾安车聘祇爱东阳七里滩谁道世间人不识客星光射紫微寒

刘遗民

雨笠烟蓑细草巾持竿谁识白莲人当时若得文王猎泾水还应似渭滨

宝林院五松

葛洪井上两三株不与孤秦作大夫借问东山岁寒木得毋羞见水西无

太白桃花潭【李白诗云太白登舟方欲行忽闻江上踏歌声桃花潭水深千丈未若汪伦送我情】

桃花潭似武陵溪太白仙舟去欲迷岸上踏歌人不见年年空有鷓鴣啼

东峯白云院

僧爱白云谿上飞白云飞处敞禅扉莫言便是无心物忆着故山依旧归

采石四咏

温峤

半夜燃犀采石江江神无处避余光未应赤帟能为害窥见渊鱼已不祥

袁宏

袁郎风格抗浮云咏史高吟世未闻乘月泛江今古有不知谁是谢将军

李白

一别蓬宫不计年锦袍吟醉钓鱼船监湖贺老天机浅轻向人间号谪仙

樊若冰

兵到金陵举国降若冰谋策谓无双由来天意归真主何必舟梁始渡江

濂溪

山为羌仙传旧姓溪因廉士得新名愿持一勺去南海直使贪泉千古清

留题城西水磨

客来亭上脱春衫马浴寒泉洗辔衔怪得主人留再住水声林影似江南

赠范鲁仲

人急生前计子图身後名重来天地远谁为作权衡

赏梅呈仲元

十年不见锦江梅今日清香入酒杯太守为施红步障郡园惊怪壽阳来

瑞香

孤根移自紫霄峰只鬪清香不鬪红忆得娉婷一株桂欧家曾见月屏风【文忠公家有月石屏风内有一桂与此相类】

访吴尉不遇

人爱红尘我爱山寻山重叩白云间子真避客游都市月上梧桐未肯还

隐静十八松

庐山社友皆逃晋秦府功臣不仕隋今日明堂求巨栋好教天下匠师知

碧霄泉鱼

岩深?薜萝金鬣弄寒波莫爱江湖好江湖罾网多

游白云山醉题僧壁

买得青山不用钱金沙门外草绵绵黄梅老令醉欲倒拟借白云今夜眠

野寺

泽国春风老杂花间芳草门前车马稀竹叶无人扫

山房枕上作

十里溪源寻未见忽逢茅屋白云堆竹牀纸帐睡正稳无奈野猿惊觉来

天台思古

游人行尽天台路山家杳杳知何处唯有山前一派溪落花依旧流春暮

还庆师扇

赠我无心着还师理亦然秋风归旧谷明月上青天

无为集卷七

卷八

钦定四库全书

无为集卷八 宋 杨杰 撰序

皇族服制图序

议曰礼院新定皇族五服图其失有五不重太祖太宗真宗之服其失一也不分润王之族其失二也不载兄弟之殇其失三也不着袒免之亲其失四也不明正统旁亲之制其失五也何谓不重太祖太宗真宗之服按周礼司服职云为天王斩衰礼记云天子修男教父道也为天王服斩衰服父之义也又云丧有四制变而从宜取之四时也有恩有礼有节有权取之人情也恩者仁也理者义也节者礼也权者制也仁义礼智人道具矣故为父斩衰三年以恩制者也为君亦斩衰三年以义制者也新图以皇帝於仁宗固当服斩衰也於真宗则齐衰不杖期也於太宗则齐衰五月也於太祖则缌麻三月也若仁宗之服诚合礼制矣若真宗太宗之齐衰太祖之缌麻是以亲服而言而不以天王之服言也夫太祖太宗真宗君天下传万世在皇帝为之服斩衰此所谓以义制者也亲亲尊尊无重於是矣新图以齐衰缌麻为服是岂达礼经之意哉故曰不重太祖太宗真宗之服其失一也何谓不分润王之族按五服勅云为人後者为其父母齐衰不杖期为其兄弟大功九月然则皇帝为濮王之服异於为润王诸子之服矣为濮王诸子之服异於为润王诸孙之服矣新图以润王子孙合而为一无以别其等降故曰不分润王之族其失二也何谓不载兄弟之殇五服勅云为人後者为其兄弟之长殇小功三月为其兄弟之中殇下殇缌麻三月开宝通礼丧葬令文皆同其说盖出之於仪礼矣而新图略之故曰不载兄弟之殇其失三也何谓不着袒免之亲按礼记大传曰名者人治之大者也可无慎乎四世而缌服之穷也五世袒免杀同姓也六世亲属竭矣郑康成云四世共高祖五世高祖兄弟六世以外亲尽无属名也又按律有八议一曰议亲释谓皇帝袒免以上亲刑统云皇帝袒免据礼有高祖兄弟曾祖从父兄弟祖再从兄弟父三从兄弟身四从兄弟是也且五世之亲旁通而有十一刑统止着其五识者犹曰未达况又全而阙之哉故曰不着袒免之亲其失四也何谓不明正统旁亲之制夫正统之服天下之通服也旁亲之服大夫则异於士庶矣天子诸侯则又异於大夫矣按礼记云期之丧达乎大夫三年之丧达乎天子父母之丧无贵贱一也郑康成云期之丧达乎大夫者谓旁亲所降在大功者其正统之期天子诸侯犹不降也大夫所降天子诸侯絶之不为服也孔颖达曰大夫之尊犹有期丧谓旁亲所降在大功者得为期丧还着大功之服若天子诸侯旁亲之丧则为服也又仪礼丧服郑康成注云君大夫以尊降贾公彦云君大夫以尊降者天子诸侯为正统之亲后夫人与长子长子之妻等不降余亲则絶天子诸侯絶者大夫降一等又汉白虎通德论天子絶期者何示同丧於百姓明不独亲其亲也又魏田琼云天子不降其祖父母曾祖父母后太子嫡妇其姑姊妹嫁於二王後者皆如都人此所谓正统旁亲之制也古者分亲所以尊正统也尊正统所以重宗庙社稷之事也虽圣人亲亲之心笃於九族而旁正之异不可不明也而新图略之故曰不明正统旁亲之制其失五也今别为图分以世次上下旁行而观之亲疎轻重之制其亦庶乎明矣

国朝宗室世系表序

汉有王子侯表唐有宗室世系表其子孙之盛概可见矣然汉表止於王侯王侯以降族裔不可得而知也唐表略於明皇明皇以後本支不可得而详也夫宗室为邦家所重其简阙若此岂非纪事者之失欤国朝之制凡宗室行封袭庆赉之典有婚姻丧祭之事虽命令所出本乎朝廷而法度参考必先礼籍是以宗室世系戚疎远近之别尊卑长少之序为礼官者所当审考而详明之也某备员太常积有岁月参考典礼兹固所职其於戚疎远近之别尊卑长少之序敢不尽心哉而有司之所记者先後详略多或异同检用之际窃惧差失乃推究源流作国朝宗室世系表太祖之子名以德德生惟惟生从又生守从守生世世生令令生子太宗之子名以元元生允允生宗宗生仲仲生士秦悼王之子名以德德生承承生克克生叔叔生之之生季曰德曰元者宣祖之孙也曰惟曰允曰承者宣祖之曾孙也曰从曰守曰宗曰克者宣祖之六世孙也曰令曰士曰之者宣祖之七世孙也曰子曰季者宣祖之八世孙也首着諡号名推爵德也属次之亲亲也子孙次之源深而流长也谨序

熙宁太常祠祭总要序

国朝岁祫天地五方帝神州宗庙大明夜明大社大稷太一九宫腊?为大祀文宣武成风师雨师先农先蚕五龙为中祀寿星灵星中溜马祭司寒司中司命司民司録为小祀凡太常典礼乐少府共服器光禄共酒齐黍稷果实醯醢将作共明水明火太府供香币太仆共牛羊司农共豕殖有司应命人或为之骚然熙宁四年冬诏以诸寺监祠事隶於太常所以肃奉神之礼也太常初置主簿杰首被命至局之日寺监羣吏各执故习惘然不知祭祀之联事杰乃集诸司所职为旁通图一卷以示之於是上知其纲下知其目大事从其长小事则专达郊庙羣祀涣然易明有司百执各扬其职职事相联罔不修举命曰熙宁太常祠祭总要云

补正三礼图次篇序

周礼六篇首曰建国国建而其所重者天地之丘坛祖宗之庙貌也三者既安则不可无宫室庠序之严衣冠车旗之饰宝货物用之利物物得正和乐生焉有所未和和之以乐有所未正正之以威物正於国则历象顺於天历象顺於天则灾咎消於物格灾咎於一时传简书於万世故礼图之次一曰地制【八卷】二曰丘坛【三卷】三曰宗庙【二卷】四曰宫室五曰庠序【共一卷】六曰衣冠【三卷】七曰车旗【三卷】八曰宝货【一卷】九曰物用【三卷】十曰乐制【一卷】十一曰武制【二卷】十二曰历象【三卷】十三曰失令灾应【共二卷通图议三卷序目三卷为三十八卷】伏惟圣主览其所图鉴其所次法其所大法行其所未行致休祥为简书之传无灾咎为号令之应历象得而顺礼得而正乐得而和宝货物用得而利衣冠车旗得而饰宫室庠序得而严丘坛宗庙得而安天下之地得而制然後圣神宗支传亿万载此愚臣次篇之意也

平律书序

世之所以治者以人之和也导其所和莫深於乐乐之所准在乎律吕是知律吕者大乐之权监而世治之本原然而上圣立法後世难知为之之物惟三【谓玉铜竹】正之之法惟五【谓数声度量权】相生以八【如黄钟至林钟林钟至太簇之类】损益以三【谓下生者三分损一上生者三分益一】禘祭则不用商声【谓三大禘律吕不用商】变声则止於宫徵【谓七声有变宫变徵】六管上下班志有所差【谓蕤宾夷则无射损而下生大吕夹钟中吕益而上生】三统余分迁史有所失【谓黄钟长八寸七分太簇长七寸二分二林钟长五寸七分四】若此之类义深者多故臣着平律书三卷律吕图三卷以明之所以副尊号皇帝景佑修乐之至意也谨序

杨氏世谱序

杨氏姬姓也其先曰尚父伯侨盖周武王第三子唐叔虞之後始封为杨侯杨侯生文文生突晋之公族食邑於羊舌突生职惠公上卿职生肸字叔向亦曰叔誉晋太傅食采杨氏邑肸生伯石字食我以邑为氏号曰杨石伯石生章征东大将军华山侯始居华阴章生欸字太初秦上卿後除弘农始作家谱以示子孙欸生硕字弘远隐居华山仙谷见五星聚东井知汉必兴後为太史硕生喜字幼罗从汉击项羽封赤泉侯諡曰严喜生敷字伯宗袭封赤泉侯諡曰定其後为新昌院敷生胤字无害袭封赤泉侯胤生敞字君平任大司农御史大夫封安平侯预谋立宣帝拜大丞相敞生忠封安平侯諡曰顷忠生谭字君公大鸿胪卿属国安平侯谭生宝字稚渊汉明帝三诏不出諡曰静节先生尝有灵雀衔环之瑞宝生震字伯起汉太尉称关西孔子畏四知惟忠孝清白以传子孙震生奉字季节後改名衆字君师任谏议大夫河东太守迁中书侍郎奉生勇汉黄门侍郎其後为东垣宜阳房勇生纂字叔绪献帝时太中大夫封常山王纂生品字文璨魏文帝时太中大夫品生国字彦高晋武帝时弘农令国生准晋太常准生林其後为荥阳房又蜀中院谱林乃准之後林生铉铉生结仕慕容氏中山相结生继继生晖洛州刺史諡曰简晖生恩河间太守恩生钧魏朝越国公諡曰恭钧生俭一名伦字景则西魏时封夏阳靖侯伦生文异字文殊隋刑部尚书文异生安仁安仁生德德生立立之孙曰隐朝为合阳令隐朝生燕客临汝令燕客生宁国子祭酒宁生汉公字用义为天平军节度使检校户部尚书其後为淮南院蜀院闽院汉公生范字宪之楚州刺史范生玠字表文吏部尚书监察御史其後为扬州丹阳房玠之孙徽字隐父初自靖康里挈族来淮南是为淮南府君徽生南宅府君曷橐臯府君杲杲生濡须府君德明德明生富字文翁次大夫复字庶几次试秘书省校书郎?字晏之富生僖价佾僎佶复生杰传汲作佺?生侁仲依杰生洙滋泳浩传生滂汲生蒙汶作生枹朴榛佺生泾洞洙生尧叟滋生袭吉袭圭是为淮南院子孙熙宁元年同南海监郡尚书郎沆及其子上卿客卿列卿会於豫章两院各出世谍若合符契至元丰四年秋杰以礼官准诏祀华岳乃拜太尉祠冢访讲堂藏书穴酌阿对泉於龙冈道过好阳省五公坟画图隐碑以归参考宗支得閩乡华阴谱本末尤详元佑五年岁次庚午三月吉日重书於会稽妙峯亭第四十七世大宋左朝请郎尚书礼部员外郎杰序

献诗赋序

彭城古之楚也山阳今之楚也古楚之剧其犹今楚之剧也古举其守亦犹今之举其守也在

东汉则袁邵公以能理剧为三府之举而守彭城在本朝则中都公以能理剧为牧伯之举而守山阳古今虽异易地则同而自下车之初躬即庠序振起风教修卫桂阳之故事是以庠序之士首形咏歌杰幸为诸生之师而耳目盛美故择题於袁卫二传以理剧拜楚守赋下车修教诗为十八日之课文在於彼而义在於此将使编民知良二千石有古君子之风云尔伏蒙传命见索所撰谨与诸生之课上献浼渎视听无任悚惕之至

大乐十二均图序

大乐十二律律各有均均有七声更相为用声协本均则其乐调声非本均则其乐悖非独雅乐若此至於燕乐亦莫不然唯工师之明於声者则能知之工师知其声而不能知其本因声以求本穷本以知变儒者之事也今黄钟为宫则太簇姑洗林钟南吕应钟蕤宾七声相应谓之黄钟之均余律为宫者仿此礼曰五声六律十二管还相为宫汉志曰宓戏氏作易纪阳气之初以为律法建日冬至之声以黄钟为宫太簇为商姑洗为角林钟为徵南吕为羽应钟为变宫蕤宾为变徵此声气之元五音之正也夫五音相生而独宫徵有变声者何也曰宫为君商为臣角为民徵为事羽为物君者法度号令之所出也宫故生徵法度号令所以授臣臣所以奉承者也徵故生商君臣一德以康庶务则万物得所万物得所则民遂其生矣故商生羽羽生角也然臣有常职民有常业物有常形不可以迁迁则失其常矣商角羽三声此其所以无变也君揔万化不可以执一方事通万务不可滞於一隅故宫徵二声必有变也今着大乐十二均图一卷既备载律吕宫调又各取一章附於篇按图考声下可以辨工师之能否穷本知变上足以赞圣明之述作云尔谨序

无为集卷八

卷九

<集部,别集类,北宋建隆至靖康,无为集>

钦定四库全书

无为集卷九 宋 杨杰 撰序

祝先生诗集序

先生讳熙载字舜咨自三衢游国庠登进士第任朝奉郎守秘书丞老於吴之华林先生悟风骚盖其出於天性幼时见邻家童诵劒池诗云林风摇晚影山月泻秋光时六岁遽谕之曰岂非林风摇晚影耶传者误尔鄉先生许洞闻而奇之及冠場屋有声名和文李公以礼币延致门馆与其二子游厥後皆称贤公子先生屡校文郡国得人为多丞相王祁公初应书时人未知名先生首荐之而巍中鼎科及典诰命文章温贍天下莫不服先生之鉴然未尝以毫发有干於相府天下益高先生之节平生与人交必尽诚不隐默以取悦其为政端方耻阿谄以事上故与时寡合志不得伸而其造道深笃於名教中自有乐地出处趣尚一见於诗夫莫邪干将有切玉之利而其用缓於割鸡黄鍾大吕有格神之和而其音艰於衆听灵草指佞而奸邪憚之宝监烛隐而魑魅恶之某尝出先生之门知先生为最深故述诗序云

唐史属辞序

仁宗皇帝尝谓商周以来为国长久惟汉与唐不幸接乎五代衰世之士气力卑弱言浅意陋不足以起其文而使明君贤臣隳功伟烈与夫奸虐皆不暴其善恶以动人耳目诚不可以垂劝戒示久远乃诏修旧史以成新书是时内出四库所藏外访求遗事於天下若文集志刻野语逸史蒐索殆徧而其删定讨论皆一时儒学之士凡十有七年而後成於是与汉晋诸史方轨并驾以垂无穷吁可谓盛矣嘉佑中其书新出而天下之士传録诵读惟恐其後时无为程鹏彦昇笃爱是书乃采一代事迹四言成文两两相比题曰唐史属辞总成四卷其於善恶邪正虽皆因其传文而於轻重谐偶若权衡然可谓勤且至也观者用力少而收功多将求镂版以广其传丐予以为序彦升有学行予科場友也初命钱塘掾上官称其材将见其所施設此未足以为彦升道元佑元年闰二月一日泗州青阳述

五代纪元序

有唐之衰五代起於藩镇梁祖始以奸雄窥窃神器虽天下畏其强盛而弑逆之祸在於闺门君不君臣不臣父不父子不子於梁氏备之矣欲永其世不亦难哉夫乱臣贼子人人弃之乘其所共弃而动之以言故末帝得以诛友珪而代之然而唐德深厚人心未忘此後唐之所以兴也武皇征伐屏翰之功初与梁祖相後先而梁祖終於取天下武皇終於藩国千载而後梁祖首篡窃之罪武皇保忠义之名善恶之致何其殊如是耶庄宗克成父志勇於征讨平定梁

氏中兴唐祀议者称之至於溺惑声伎吝嗇赏赉此其所以亡也所谓暴威武者或困於声色之娱屯其膏小贞吉大贞凶庄宗有之矣庄宗明宗闵帝废帝四世三族姓异号同同尊唐室致有唐庙貌虽石晋之代亦宗祀之而不敢废乃武皇庄宗之力也晋高祖利建大号以君父事契丹及少主嗣位欲正名分召徠敌寇割裂中夏人主后妃蒙尘异域皆高祖之罪也汉高祖有赴难之迹惜哉不克成其功当中原无主之际徇輿议而即位不犹愈於僭窃者乎隐帝不能驾驭英雄潜行诛戮倾覆宗社诚自取之尔周高祖世宗可谓英武也已而其享国不永恭帝冲幼讴歌不归斯盖历数在乎真主非人谋之所及也五十三年之间生灵困於涂炭王道衰而不振史氏荡而无法秉笔之士为之叹息呜呼十三主有君天下之势而无君天下之道君无其道则赏罚有所不明君有其势故纪元之法以托之也或曰编年系事必具四时在纪元则梁祖不书春庄宗不书春夏秋冬者何为也曰唐历未终不可以与梁也梁历未终不可以与後唐也不与之所以正正统也正统不正何以正天下哉治平三年春正月序

补编年图序

编年图任山先生之所撰也始自周平迄於圣宋岁之甲乙列於上国之年世列於下稽诸史牒咸得其实先生授于建谿张君予於张君而得焉周平而上或患其阙因自尧舜而补之夫先生之图祖春秋也某之所补祖断书也圣人之法相为表里不亦可乎皇甫谧曰尧生甲申岁孔安国曰尧年十六以唐侯升为天子故即位於己亥也书试舜之年曰朕在位七十载故试舜於戊申也试舜三载曰汝陟帝位故舜摄於辛亥也二十八载帝乃殂落【自舜摄之年】其崩於戊寅也舜生三十徵庸故舜生於己卯也三十在位【历试二年摄位二十八年】故即位於庚辰也禅禹於壬寅也正月朔旦受命於神宗故禹摄於癸卯也五十载陟方乃死故崩於己巳也史迁曰舜崩三年而禹即天子位故禹即位於壬申也皇甫谧曰夏啓元年岁在甲辰禹当先啓三年而崩故崩於辛丑也皇甫谧曰禹年百岁故生於壬戌也又曰啓立十年而崩故崩於癸丑也自啓至於周之共和不得而补年祀不明故也惟汲冢纪年曰夏有王无王用岁四百七十有一故夏亡於壬戌也夏既亡商宜有天下於次年故汤践位於癸亥也皇甫谧曰汤践位十三年而崩故崩於己亥也汲冢纪年又曰汤灭夏以至於受用岁四百九十有六故商亡於戊寅也商既亡周宜有天下於次年故武王践位於己卯也共和而後皆据史迁年表而补之噫自啓至於共和年祀不明则有矣世次可得而明故载为三代世谱时皇佑二年二月二十六日序

楚风序

楚风者何楚人美太守之诗也诗有四始曷为谓之风本乎师乙之法师乙曰正直而静廉而谦者宜歌风进身以道吾太守之正也不为势曲吾太守之直也仁不挠物吾太守之静也介洁自守吾太守之廉也接士降已吾太守之谦也故楚人之诗有美正直而静者有美廉而谦者得师乙歌风之法是以谓之风也

清献赵公寿莹颂序

元丰二年春资政殿大学士太子少保赵公连章得谢归於三衢是年冬卜寿莹於先莹国令公兆域之侧乃自作颂题於壁间後五年公薨天子闻讣震悼辍视朝优赐赙典以太子少师告第太常考行以清献易名尚书省集议金以为当朝廷从以諡焉古未有也公子?初辞御史又辞太仆丞愿就养於南国上嘉其世孝诏提举两浙路常平广惠仓以便养志也及遭钜创每视壁间所书颂则号慕殞絶思刻石以广其传乃属某以为序某闻患莫大於爱生累莫重於畏死至人无已悟其本不生故其存也无所爱达其未尝灭故将亡也无所畏惟其无爱无畏乃能致其忠竭其孝一其诚而冥於道至於不陨获於贫贱不充诎於富贵见利不亏其义见死不更其守其余事也公之颂章首曰吾政已致盖戴吾君从其乞身之请退而不敢忘其忠也次曰归此山地盖言吾亲全而生之已将全而归之没而不敢忘其孝也又曰彼真法身不即不离盖了觉本源实无生灭一其诚而冥於道也公其至人乎来者观其颂则知公之所存矣八年冬某被命典客访道南游将还京师得公子书至武林乃为序云

石声编序

嘉佑五年夏四月依智高叛广南晋康太守赵公死於难夫贼势不可敌而太守敌之不曰勇於义乎去晋康则可以生而太守不之去不曰固其守乎既知其不可敌又知其不可去而太守不自屈其节而死之不曰忠於国乎故闻太守之风者庸懦之人激而勇苟生之人激而守奸邪之人激而忠有是三者之大节而为教於天下天下贤君子得不闻而称之乎是以具於奏牒者二状其行事者二铭表其墓者三记於祠堂者二形於声诗者不可遽数太守之弟殿中丞世弼集其所得诗以示杰且以序见托杰按乐记曰石声磬磬以立辨辨以致死君子听磬声则思死封疆之臣请名其集曰石声编将使万世君子见其诗思其人其犹听石声而思之云尔太守讳师旦潜叔其字也

讲周礼序

周礼者周公建六官致太平之书也公以圣人之德极辅相之尊通天下之志成天下之务故能作是经述是礼为万世之大法也其略见於周官其详载於六典六典者何治教礼政刑事也治无不统天之道也天官冢宰以掌之教无不容地之道也地官司徒以掌之和豫者礼其序春也春官宗伯以掌之正大者政其序夏也夏官司马以掌之肃严者刑其序秋也秋官司寇以掌之富有者事其序冬也冬官司空以掌之治则不言而化也教则见于言矣礼则见於容矣政则见於令矣刑则见於威矣事则见于物矣此其精麤先後之序也六官帅其属三百六十期之日也自天子诸侯至於公卿大夫贵贱莫不有位自王畿至於侯甸男采卫要蕃远近莫不有制自天地宗庙至於百神祀享莫不有常自正月之吉至於岁终施为莫不有时自人至於鸟兽草木养之必有其道自宫室至於车服器用制之必有其法无一职不修而王道备无一物不化而岁功成此所以致太平而敬天命也不幸遭罹秦火絶灭典常出自山岩遽藏秘府冬官亡失既不获其完书士儒相传久已弊於俗学圣上悯其若此命儒臣以训释旨归列之科选使成周太平之迹焕然着明於本朝诚千百年希阔之遇也然而执形器度数之学者不知制作之所存泥道德性命之说者不能考合以适用盖学礼者之所蔽惟不执不泥然後能尽变通以致用上以副朝廷经术造士之意不其盛欤

题跋

题孔融四公颂

华阴靖节先生宝九岁时放一黄雀其夕有一黄衣童子再拜曰我王母使者感君仁爱救拯实感存济授以四白环令君子孙洁白位登三事当如此环其後震秉赐彪四世太尉德业相继及曹操欲害彪时孔融为将作大匠闻之往见操曰杨公四世清德海内所瞻今横死非辜则孰不解体融鲁国男子明日便当拂衣而去操不得已而出之观颂诗则见孔公之诚心矣此卷翰书奇古有御书印及空阙景皇神尧讳验是唐朝内府所藏靖恭杨氏世世传以为宝其世字民字尚未讳者盖贞观以前书也

题范文正书伯夷颂

伯夷避位孤竹责仁於周义不食粟死於首阳可谓圣人之清已其於时也不亦难哉文正公书伯夷颂时今中书丞相侍行青社三十年间继登宰辅泽被四海有若伊尹格於皇天有若伊陟格於上帝盖千载一时也元佑四年四月四日权发遣两浙提点刑狱公事杨杰谨题

题慧应大师运气经络图

五音之变六律之序治乐者不可不知不知是而考击成声者岂非偶谐欤四渎之源百川之会治水者不可不知不知是而疏导有功者岂非幸中欤黄帝之书医家所重详究其义五运六气犹乐之五音六律也十二经络犹水之四渎百川也安可忽之哉余久官奉常屡被诏考校太医官学者之於运气经络通者亦鲜然後知医术之为难矣昨见钱唐慧应大师智全所出五运六气十二经络图因召而攻其所学本末皆见於黄帝之书盖家世师承有所自矣讲学之暇益精於此其济人之心孰御焉元佑元年三月二十有九日洞庭舟中题

题浮渡山峯岩图

潜叟乐山水至浮渡乐而甚故为山之峯岩图一曰安为其可以居也二曰怪为其有所象也三曰险为其往之难也四曰幽为其邃而异也居广泉甘安之上也有一不及安之中也有一不足安之下也象而近之怪之上也象而或差怪之中也象而或疏怪之下也人不能往险之上也往而惕然险之中也往而或惕险之下也既邃且异幽之上也有一不及幽之中也有一不足幽之下也已而示於达翁达翁笑之曰子所谓安安之常也子所谓怪怪之常也子所谓险险之常也子所谓幽幽之常也吾闻之大安不居大怪不象大险不难大幽不邃安乎怪乎险乎幽乎在於是图忘其图不尽山之胜乎此岩图其来固久历世状者不知其几人矣其如形势尚未之辨则其安怪幽险又焉所及乎金陵僧慧渊善於水墨丹青非独能辨其形势至於安怪幽险悉精妙乎笔端实与造物者争其先後也或平昔乐於山川者纵未达是境若披是图亦可以尽得於心目矣

无为集卷九

卷十

钦定四库全书

无为集卷十 宋 杨杰 撰记

洪州门记

今天子即位元年春三月己巳洪州初以州名表於门何以书重正名也豫章之水源於?化会贡水而为赣东北至於洪崖之阳汉置郡曰豫章因水名也隋易郡曰洪州因山名也唐治军建节曰镇南制远俗也伪唐僭称南都避中原而卜迁也皇朝削平僭伪声教被於四海州名从隋仍旧贯也镇名从唐存武备也镇名则有节度使以领之州名则有观察团练刺史以领之是二者之名不可阙其一也而镇南之名固已表於府门矣惟州名则阙然未之表也兵部施公出守是邦以德义镇俗事为有本乃命以州名表於中门表之所以正名也正名可书不可不书故书

西水磨记

都城当万国之要会升平日久比屋富庶四海内外宝货丛聚车无停辘马无缓轡晦明寒暑冲冲交驰乎其间有闐闐之喧所不及处已不可多得而况流水潺湲嘉木蓊鬱鱼鸟上下风物清胜有山林江湖之气象者乎都下水磨务有三皆国朝所置以供尚食暨中外之用然其景趣不同而所谓有山林江湖之气象者西务是已将造其门水声先出乎林间行及其旁则长槽泻波钜轮激涛雷轰电射雪迸雨飞若并谷帘若临洪崖使人毛发森然语言不能相接有景如此而都人罕有知者自宛陵梅平叔太原王汉卿之领是局也荐绅往往至焉主人嘉客之来临流设樽拂石为坐垂钓清渊鱼泳而同食弹琴曲渚鸥驯而不惊沙泉盈尺蹴可以涉渔艇一叶醉可以卧方是时也宾主陶然如在江湖之上山林之中乌知车马闐闐之喧哉朝野诸公多有诗咏或形汗简或题屋壁凡数十篇汉卿官满惧异日之遗坠乃鑱诸石以传永久知予尤爱其景故托以为序盖所愿也元丰二年中秋日述

淮阳古井记

淮阳之井卤而少甘其民多汲於沂泗光禄卿刘公之守是邦也问风俗而始知且叹之曰一郡之井不为少矣胡为斯民舍近易而趋沂泗哉谓井不可食岂其然乎於是使人徧汲郡井而尝之俄於後圃榛莽之间得废井焉其泉冽然若冰而甘以之烹茶则茶浮而味久以之酿酒则酒醇而色清又以旧所畜扬子南 水及惠山泉以校之则轻重几乎等矣爰命缶以出其浊石以洁其外亭以覆其上由是瓶縑不絕汲者便之予道过淮阳得其语於郡人公且以记见托予闻井者德之地也古今有变而井不变犹士君子之有常德乎故井不患乎不汲患乎泉之不冽士不患乎不用患乎德之不修泉既冽矣德既修矣人或不之汲世或不之用非井与士之不幸盖物不幸不得其利尔噫斯井也前此几千百年荆榛蔽之泥沙混之禽所不

窺人所不食豈其泉之不洌耶曷其湮塞之若是耶使秉權者有能推劉公求井之心以求賢則豈獨能輔天子之明且足以均天下之澤矣易曰井渫不食為我心惻可用汲王明并受其福此之謂也治平三年五月十日無為某記

二軒記

臨潁令楊彥武謂無為子曰我山陽嘗構二軒於燕習堂之東北隅二軒之制不侈不陋聚書万卷足以示子孫潔嚴豆觴足以奉賓客累石以為山無摧輪折軸之險而蒼翠可愛甃石以為沼無狂风怒濤之畏而清泚可鑒也野芳秀而香不知所從幽鳥啼而聲不知所起每閉戶宴坐陶然自得頓忘身世之累行將解紱綬之縛而歸休其間因名其一日覺軒其一日息軒蓋覺性未悟求悟者指之息心自信求信者言之指而言之非子而誰夫并萬物而生於天地間其靈貴於萬物者人之謂也鳥獸虫魚惑於所嗜嗜而不能自息此其所以為人獲也夫學而有見者覺也自心而休者息也不學則不能自覺無所覺則不能自息覺則不惑於所嗜息則不困於所動其幾於道矣昔人言有畏影惡迹而去之走者舉足愈數而迹愈多走愈疾而影不離身不知處陰以休影處靜以息迹是豈足以語二軒之意歟元豐三年秋七月記

養志堂記

親心所向謂之志善承順者謂之養子之事親養志為大養體為次故元之於參不若參之於皙此孟子所以優稱其孝而孔子授以經也於戲曾子世不得而見之得見慕曾子者其亦庶乎鉅鹿魏丞綸即龍圖公之嗣子也為知者所辟將擢以任君辭所舉而以潁陽樵醢為請便親養也是時仲氏官於豫章兩境相望不數百里太夫人所至安問交馳晨昏寢食怡怡如也諸大夫以是稱之而名斯堂為養志云無為子聞之曰事親孝者忠可移於君古者求忠臣於孝子之門良有以也然而有隱無犯事親之道也有犯無隱事君之道也色難之難猶犯顏之難不難其難其孰御焉篤於誠而已矣熙寧三年八月十五日記

九華藥圃記

九華山多產靈藥樵蘇耕獵居人游士日往來於其間而罕能辨識故其藥初不見用於世藥之見用非藥之幸廼病者之幸也藥不見用非藥之不幸廼病者之不幸也昔有至人過其山別其名品以示人曰此養命之藥也此輔性之藥也此治其疾之藥也用之莫不然由是九華靈藥多載方書山中之人悉能辨識蓋有所自矣永靜太守南陽滕大夫潤之家於池州州距山甚迓嘗筑圃於所居之西擇九華之藥可以種者種之可以移者移之分畦以別其品立石以識其名清泉灌沃澤根本也惡草鋤去養善類也不雜花卉悅不在目也不植蔬果嗜不在味也藥齋居中用藥之書聚焉藥軒在北治藥之器具焉華實根葉采之有時君臣主使處之有序以之攻疾無不痊以之施人人蒙其惠於是藥圃之名傳於縉紳莫不慕大夫之所存無為子聞之曰噫是烏足以盡大夫之所蘊歟大夫之先內閣公在祖宗朝嘗獻苦口之忠言上以匡國建去害之長策外以安邊人到於今賴之大夫承義方之訓性治行修平生懷濟物之術所至必蠲民之瘼讀家藏儒釋道諸書愈久愈深其學博而不自矜其善積而不自有在

老氏曰涤除玄览能无疵矣在圆觉曰於大乘中发清淨心远诸杂病矣乃知药圃之设为恤物之一端乌足以尽知大夫之所蘊乎元丰八年五月十一日记

秦氏中斋记

斋学舍也君子居而斋肃焉故曰斋中名之从筮也皇佑元年冬十有一月朔秦君学舍成索太玄而筮之遇中□【一方一州一部一家天首也家性曰星曰牵牛时曰冬至数曰奇】杨某辞之曰星舍於北与首同德冬筮而冬在时曰从画而逢阳廼数之祥一之文曰贤人天地思而包羣类也居之者其潜心之远乎五之文曰君子乘位为车为马车轡马 可以周天下居之者其将获用於时乎七之文曰仁疾乎不仁谊疾乎不谊君子寛裕足以长衆和柔足以安物居之者其将能任於刑德乎是之谓星时数辞从故名之而记于壁

采衣堂记

婺源胡氏五世同时子养其父而逮养其祖之祖父鞠其子而及鞠其孙之孙州闾乡党推为令族尝构堂於家园宅风物之胜处羣峯环翠屏如也寒泉湛碧监如也幽芳啼鸟爱之而不可胜名老木修竹之而不可胜筭每晨昏燕闲亲族咸集老者坐於上稚者戏於下长者侍於侧少者服其劳山樽桮餽具不待丰而人以为甘矣况有豆觴之奉乎鸣缶击壤乐不待举而人以为和矣况有箫鼓之繁乎颓垣隘宇居不待壮而人以为安矣况有大厦之庇乎弊裘緼袍服不待侈而人以为楚矣况有采衣之绚乎乃祖乃父乃子乃孙雍雍怡怡以遨以嬉岁月久而不厌齿发晚而不衰缙绅大夫乐为歌咏以榜於堂曰其堂曰采衣盖取老莱子之养以美之也既而闻於京师求无为子以为之记无为子曰前此百有余年僭伪未克日寻干戈父不得保其子者有之子不暇给其父者有之矧有五世一时而安居者耶观胡氏采衣之乐则海宇升平之久可知矣是可书也熙寧六年重九日记

杂文

世网篇

达翁居於淮之滨潜叟过之而舟於淮潜叟东指谓达翁曰树林之陰顶笠裘蓑者有所负乎翁曰网叟曰乌乎用翁曰兹取鱼具也且世亦有网君知之乎叟请达翁因有世网说昔伏羲氏之有天下也受图书肇人文纳百姓於治而百姓不知其所以网因作田鱼之器以明已之用故易曰显诸仁藏诸用百姓日用而不知然则世之网经营於此乎已而授神农氏神农得而归天下之民获天下之货及其世衰子孙不能张焉故有轩辕氏生以正其纲纪纲纪既正以之授少昊少昊以之授高辛高辛以之授摯摯受之而不能举且罹洪水之患网之纲几乎颓圣弟放勳亟命鯀以治水鯀功不成而继以文命文命获洛书而能治之水患既平网亦以缉故书曰天锡禹洪范九畴彝伦攸叙尧既张之而民亦不知其张有击壤而歌者曰日出而作日入而息凿井而饮耕田而食帝力何有於我哉尧以舜贤而授舜舜以禹有功而授禹禹以授啓自啓而後世失其人纵田猎而渎之者有之矣乐酒色而乱之者有之矣故坠于弛废

而不举汤患於意者久之因出见网张于野不知意之形於声曰自天下四方皆入吾网已而惧言出之而遇桀之刑因就变曰吾不忍尽取禽兽盍往归焉且不知其入汤网也历数世而子孙暴乱其网之坠犹夏后氏之末世西伯昌兴而叙之故其诗曰勉勉我王纲纪四方西伯以之授武王武王受而大辟之以纳天下故其诗曰自西自东自南自北无思不服武王以之授成王成王守之而正天下故其诗曰受福无疆四方之纲及其世衰则有诸侯干纪以乱其叙故雄曰周网解结群鹿争逸自时而至五代蠹网家流出焉或执器而断之或辟路而逃之人有识其器达其路则陶陶然熙熙然不为是非哀乐动其心不为得失生死累其正君子以之静小人以之乱非叟不可使之知知是网其知几乎

南山移文【并序】

繁昌之南有山曰隐静其林泉为江东之胜物外之人多或乐之吴越江逸人爱而不能去无为子游必见焉逸人一日出山久而未归无为子惜其不返将督人以归因思齐朝周彦伦尝隐於鍾山後出为海盐令欲再过其山孔稚圭乃假山灵之意移之使不许得至故云北山移文夫责於已失不若救失於未然使其不得至不若督之以归故作南山移文且以简於山居二师云繁昌之境南山为胜君子有时而隐仁者所乐乎静松敞重门石开修迳玉淙琤乎双溪屏回环乎五岭旦禽啼而杵药夜谷响而鸣磬子虚之洞兮链九鼎而云飞碧霄之泉兮涵万象而月莹昔在梁国粤来西圣盃浮空兮倏忽千里锡穿石兮汪洋三井寺以之建徒以之盛间有高士卜居尽性无修而修无证而证非分别以为智不起灭而为定有蒲有葛足以备於岁服有芋有蕨足以充乎晨飧名不及兮冗无尘纓利不在兮喧无俗乘子居之安兮吾以子庆子出之久兮吾以子病归欤归欤子其吾听

圆同庵铭

圆同庵前睦州江令尹家圃元丰八年冬钱塘净慈本禅师为题其名又请余铭云

南宫令尹结庵桐庐泯絕一致森罗万殊芥纳须弥像入明珠牕壁户牖几杖屏盂动静语默夕寝朝飧可卷则卷可舒则舒孰得而亲孰得而疏其小无欠其大无余强为之名圆同太虚

圆寂庵铭

万化一源万念一息法无不圆念无不寂强名而名车尘马迹是庵何如风清月白

休老堂铭

妙高峯顶不住正处毗耶离城别开一路铁鉢铜瓶葛巾革屨付者不取取者不付谷有归云木有凝露师子频伸象王回顾门外老胡一苇横渡

愚斋铭

嘉佑四年秋八月大理评事孙琪建愚斋於山阳官廩之东郡学教授试秘书省校书郎杨杰为之铭曰自贤其愚小人之徒贤而自愚君子之儒斋乎斋乎君子所居

清白堂铭

清不足恃白不足矜尔恃尔矜人其尔憎衆浊独清屈原所以损其身知白守黑老氏所以全其真清哉白哉难乎其人能於是乎其与道邻

无为集卷十

卷十一

钦定四库全书

无为集卷十一 宋 杨杰 撰

表啓

润州到任谢皇帝表

久官省寺无补朝廷乞守方州愿伸微效拜伏新命得经岁以待期归省故园实均恩於赐告慰见民吏恭布教条【中谢】伏念臣少起农耕长从科举策名清世垂三十年备员太常连六七任在先帝一朝礼乐尝玷讨论遇陛下千载风云屡更任使以至陪宾讲道入部为郎既逃辱命之讥仍免瘵官之责遽形外请蒙赐中俞此盖皇帝陛下洪覆无私靡遗一物大明继照广被万方纘至治於唐虞不忘勤德保成功於文武克念宜人致此懦愚亦膺委寄臣敢不下求民瘼上体天心宣化承流冀仁恩之浹洽惟良共理思训勅之丁寧誓罄涓埃仰酬造化

润州到任谢太皇太后表

乞守方州初虞僭冒岂图睿旨曲赐允俞已见耆年仰宣圣泽【中谢】伏念臣生本寒士出逢盛时强起应书累尝随赋自忝一第历奉四朝惟知直道以事君讵肯阿权而进已省寺承乏岁月屡迁犬马之齿渐衰天地之恩未报固求补外奚止便私耻将空老於熙辰实愿收功於晚景而况润称京镇爲江左之名藩唐择守臣摠浙西之诸郡禄丰地重材薄望轻退省无能拜荣增惧兹盖伏遇太皇太后陛下母仪累圣子育羣伦其仁如天每听卑而矜恤以慈为宝务从治以生成致此琐材亦分优寄有民有社敢上负於苍穹尽孝尽忠誓益坚於素节

两浙提刑谢皇帝表

守符未久报政无闻叨被圣恩就移指使【中谢】窃以先王明罚期弼教以化成君子尽心必求生而参听遣使诸路自我盛朝狱非无辜人浸余泽以至完甲兵以禁其寇暴积仓廩以济其困穷惠民为深领职尤重如臣蹇拙适用寡能拜命战兢以荣为惧兹盖伏遇皇帝陛下道周庶物德被万方尧舜好仁於变可封之俗成康善继寢隆几措之风敢谓渥恩致加微品臣敢不详其枉直约以重轻仰酬钦恤之诚敬奉丁寧之训誓捐顶踵图报乾坤

两浙提刑谢太皇太后表

出守左符未逾朞月遽闻赴阙之命寻乞外邦致膺持节之华就移本部拜恩视事冒宠踰涯【中谢】窃以祖宗以来屡降钦哉之训典刑所系审知使者之难江湖尤重於三吴圉圉与闻於一路俾无冤滥责以澄清兹盖伏遇太皇太后陛下坤顺含光巽重申命焞天密补鰲安

立极之功汉网益寬鱼泳吞舟之乐臣敢不敬遵中典上体至怀刑期无刑祈报大生之德讼使无讼助成丕变之风

谢修南朝正史及赐笔墨表【代王相公】

叨被宠休伏深战惧【中谢】臣闻尧舜盛德书首载於典谟文武成功政备存於方册信莫如史才难其人直笔所传历代攸责惟二圣之言动着百王之范模贤能进而任本朝廷礼乐兴而度越今古赏有功而善者劝罚当罪而恶者惩区宇攸寧人物富庶将纪隆平之治用诏无穷必资该洽之才仰膺茂选岂宜寡陋获玷讨论荷给札之殊荣徒怀铅而增慙

礼部贺冬至上皇帝表

伏以七日阳生气肇萌於子位八龙乐奏音已協於黄鍾君德寢昌人心胥庆【中贺】恭惟皇帝陛下对时化育凝命穆清适当景至之辰拥集朋来之佑推策迎日履长用保於无疆理物承天行健永期於不息臣某等幸逢令序获遇熙朝同倾百辟之心上献万年之寿

礼部贺冬至上太皇太后表

伏以御察璿玑二曜应乎合璧审观玉律一阳动而飞灰云物效祥钟竽協乐驩腾华夏福集邦家【中贺】伏惟太皇太后母仪三朝子育羣品佑神孙而隆庆扶宝运於无疆政必身先顺布阴阳之教神潜德本默参天地之心推周历以开端望尧门而献寿

礼部谢春衣表

伏蒙圣慈赐臣等春衣者窃以天道下济常覆被於羣生春服既成首分颁於庶位【中谢】恭惟皇帝陛下顺时布政爱物推诚宠賚所以劝功寒燠与之同体爰自造庭之士咸均在笥之华臣某等就列垂绅蒙恩赐帛无补经纶之业称服其难退思机杼之勤饰身益愧誓坚大节仰报至仁

礼部谢冬衣表

万乘御裘方戒祁寒之备羣臣受服幸无终岁之忧伋伏知荣曳娄增賁【中谢】恭惟皇帝陛下诞敷醴化广庇含灵齐七政以观方叙四时而成信凡有加绋之焕轸及外庭士均挟纊之温敢忘盛德臣等拜恩华粲省已愧兢誓极捐躯庶将报国天地至大曲全生育之功松柏後凋愿固始终之节

白沟谢御筵奏状

将命乘轺讲隣懽而惟旧及疆授馆蒙郊劳之至优丰腆肴觴溥沾皂隶荷惠慈之加厚在诚

意以深铭

新城谢抚问表

候人在道方伸入境之仪使者传言遽拜问行之惠【中谢】窃以肃将国命敦结邻欢属寒律之载严荷温辞之曲谕仰怀恩眷第极感铭

中京谢皮褐表

候届祁寒恩均盛服恭承存抚滋集钦铭【中谢】窃以诞节修仪轺车将命善言曲谕已均挟纊之温厚意所加仍拜授衣之宠真怀无斁叙感奚殚

谢馆宴奏状

弭节修途柅车华馆重沐示慈之贶益衔将意之隆仰荷眷私第铭衷悃

谢签赐酒食奏状

征轩爰止旅次甫宁荐纡肴醑之沾仍厚饗殮之品永惟刻荷莫究敷陈

谢王饯奏状

轺车将命夙致於邻懽多物在庭特丰於宾饯仰祇恩礼深激悃悰

谢射弓御筵奏状

息骖駢而就馆夙被眷存讲燕射以娱宾继叨恩赐矧乏和容之善徒增拜赐之勤

谢餞送御筵奏状

轺轩修好方成命以言还祖席优宾复宠行而垂眷感铭斯切敷叙奚殚

回燕京留守三幅书

恭持信币甫届陪都方修汗竹之仪特辱荣函之贶竦钦谦揖徒切感铭

回中京留守赴筵书

修庆诞辰假途畿壤方驻巾车之役遽申酌醴之欢叙荷意勤永藏衷素

回诸州召赴筵书

肃将信币方柅輶车敢图主礼之勤特辱宾筵之召悚藏弥切敷述奚殫

回日谢中京留守召赴筵书

讲睦宝隣还经乐土特辱賸函之贶仍烦燕豆之陈重荷眷私倍增感悚

谢杭州蒲左丞啓

皓首为郎愧无功而报国朱方守土遽有请以蒙恩涓日莅官依仁为幸恭以判府资政左丞学深原本识究几微四海元龟三朝旧德忠以许国人无间言出镇东南均休中外棠阴方茂斯民惟恐於公归槐位久虚品物愿依於神化某荷知有素托庇云初支郡所拘不得亲承於教令與人同欲其将再入於陶钧

谢蒲左丞荐啓

伏蒙封章误有论荐者窃以朝廷选士言取信於大臣君子爱人才不遗於片善称扬躋等感仰悸衷伏念某赋性甚愚适时无术虽预闻於礼乐曾何补於邦家唯知固守於旧章讎敢曲从於异论自慙寡陋公则誉其该通人笑阔疎公则许其刚正昔依造化垂庇已深今托部封辱知尤重兹盖安抚判府左丞资政存诚仁厚为力寒微弗求备於一夫推博爱於多士经营大厦国工无可弃之材旋斡洪钧真宰无不陶之器荷恩特达镂骨深铭期勉力於後图庶不辜於先鉴

交代啓

叨被圣恩获承府政夙敦事契益拚悃悰交代某官台阁元英朝廷硕哲久淹大用屡易名区方此召还伫膺显拜顾蒙成之甚幸愧代斲以非工赖有余风得为来范聯登桂籍已均兄弟之亲交受竹符愈重子孙之好披瞻在迩跂望尤深

贺无为知郡啓

伏审涓辰已谐视印恭惟庆慰某官世传忠义天稟贤明分宵旰之忧惟良共理为生灵之福易地皆然江民方切於去思须郡久歌於来暮五月而报即听政成一节以趋伫闻君召某窃向风有日拜德无阶顾惟父母之邦幸陶雅化重计庙堂之器难久外藩伏乞上为朝廷精调寝膳

回贺王敏甫学士馆职啓

窃审光被宠恩进膺华秩自闻成命弥切忤心伏以图籙秘藏上帝名之册府贤能丛聚前古谓之蓬山岂徒收校籍之勤盖所重育材之地文章翰墨得士为多辅弼公卿由此其选时髦显擢舆论金归恭惟判院学士国器宏深天资茂粹彩衣就养业诗礼以趋庭青云致身角英雄而入毂衆识高誉名重上知方挺秀於相门再假途於儒馆金匱石室雖千載之遗文鈿轴牙籤传一家之旧物经纶有素步武曷量固宜自负以轩昂敢谓不遗於鄙贱连城至宝过僻陋以暗投万里亨衢知扶摇之远到铭深肺腑留示子孙

贺冯待制知扬州啓

伏审辍班近侍出镇雄藩凡预庇庥伏增庆拚恭以知府待制器深廊庙德粹圭璋分注上忧暂从外补溥天之下搢绅推翰墨之师自淮以南筹幄赐生灵之福伫闻节召入赞鼎司某幸以不才叨佐属郡燕雀微羽栖大厦以在期荆棘凋丛戴卿云而有日伏乞上为宗社调护寢兴瞻望旌麾下情无任欣跃之至

贺吴司谏馆职啓

向审光奉宠书荣陞秘馆伏惟庆慰某官修诚端本造道资深擢自贤科任当谏列尽忠补阙增帝袞之文章执节弹邪耸王朝之?墨聪明眷注中外乐趋会芸阁之抡才庆蓬山之得路牙籤鈿轴緝唐室之遗经金马石渠踵汉儒之故事岂图谦德先辱珍函曩属居忧久稽驰庆感悚之至并集所怀

贺欧阳枢密啓

向审光被制书荣陞枢府伏惟庆慰某闻宥密之职太平所基贤哲在官生灵受赐岂独一时之福实为长世之休恭以枢密侍郎上台元精清庙重器文章道德素推天下之宗帷幄筹谋默赞圣人之治剴裁几务协契輿金将使朝廷无万里之忧夷夏服两阶之化三山僊路昔游翰墨之林九重帝心今注诗书之将安危所系中外具瞻永扶丕图大庇羣品

贺南京留守张端明啓

伏审抗章得请出镇荣归於朝廷则地重而寄伏在闺门则意承而色顺由圣贤之相遇致忠孝之两全惟侍奉亲闈燕安里社明珠还浦故都增川媚之辉灵鹤归辽旧俗有羽飞之望上方眷求元老虚伫嘉谋行闻节召之严入被鼎司之拜用爲霖雨徧敷润於邦家勿剪甘棠永垂阴於桑梓某夙承獎擢即预陶钧趋覲未前具瞻尤切伏乞上爲宗社调护寢兴

贺东宫待制啓

伏审光被宠书荣迁峻秩伏惟庆慰窃闻职清内阁任重先朝必择正人以副輿望恭以某官搢绅?墨廊庙栋梁爰自春宫夙隆天眷商山旧德汉皇之羽翼已成秦府功臣唐代之典章取

定即升台席大庇邦氓某属在浙江叨乘使传未由趋庆伏重跂瞻

贺杭州苏内翰啓

伏审抗章中禁得请名都窃惟庆慰?以知府内翰识究几微学深原本忠义耸本朝之望文章爲多士之宗四近未陪輿情攸鬱顾东南之会府益茂棠阴采中外之公言愿陞槐位五月而报即俟政成一节以趋竚膺君召某荷知惟旧瞻德有期跂望旌旄卑情无任欣忭之至

贺熊待制移金陵啓

伏承抗章玉阙得请金陵窃惟庆慰恭以判府钤辖侍郎待制德重端朝忠纯体国未陪四近弥鬱羣情顾六代之名区邻三吴之旧境假途红幕钦婉画之尚存移建碧幢实坐筹之有赖锦绣增荣於榆社封疆密接於棠阴即趋召节之严难久偃藩之乐

上茹都官明堂图书

某闻大礼废非至圣莫之兴大礼兴非钜贤莫之述明堂之礼其天下之大礼乎明以出政教幽以交神灵根萌於黄帝唐虞干枝於夏商周华叶於秦汉魏晋宋齐梁陈隋唐之间剪伐於五代苏培於今天下前曰大礼废非至圣莫之兴者此之谓也然而朝廷林藪臣子亿万举知大礼之兴鲜能述所兴之礼惟阁下既能知之又能述之作爲诗颂奏露天子若夫造化之工张列三辰罗布万物以文饰天地未足状其功也秋江夜涛春山晓雷浩浩轰轰不絶未足状其辞气也孤竹之管云和之瑟圆丘六奏感彻太极未足状其音容也神仙之庭岳渎之藏阜积金玉渊聚珠贝未足状其富学也是以耸动旒冕特诏褒宠外藏之太史氏千万载後爲世盛事前曰大礼兴非钜贤莫之述者此之谓也某襟衣尘埃闻见寡隘阁下辞学敢望之乎二者不敢有望於阁下於阁下之功固不敢有所望也然而心胆壮鋭不甘无述故搜历代明堂之制於经经不足以及乎传传不足以及於史其文虽得其象莫见廼索文而求象据所象而爲图图成而其篇二十历代之制敢谓十得其八九矣其有辞枝义失世所不从则略而不取其所以不自赧缩远从山林敢投献於门下者非徒然也欲乞阁下政余赐览损益差繆以足其心尔阁下不以寒贱爲却而从之则异日国家建明堂访古制某进所图无复畏慑矣非独爲寒贱之光抑亦使当世知阁下风化之致焉

上金陵知府书

杰无爲人以淮南方伯之召而客於楚闻南使过楚楚人有问之者曰尔不远万里将有献於朝廷其何物耶使者曰炎海之滨有兽其神若兕匪兕若麋匪麋一角载义四蹄履仁行以中矩游而不羣爲世之瑞命之曰麟楚人曰角之戴义义不足以尊尊蹄之履仁仁不足以亲亲行之中矩不足以世法游之不羣不足以絶伦匪兕匪麋匪兕之邻瑞之来何所补於吾俗瑞之隐何所损於吾民世之治乱在乎人孰谓系於斯麟使者屈之默然而去有士於此少而穷仁义之原长而得仁义之道非仁义之行不敢以行非仁义之言不敢以言不生於穷荒

之地而生於中和之域不求知於狃俗而求知於大賢或遇其知而獻之朝廷則非獨使萬目之駭其必有補於世而不玷乎大賢之知雖不足以爲天下之瑞而亦無愧於是麟也願閣下少加意焉伏惟閣下富文老學天下宗師所黜所譽士林權監杰世族寒賤人所不顧今日之來不敢以諂言支說取渎大君子敢以所聞獻於門下以俟進退

無爲集卷十一

卷十二

<集部,别集类,北宋建隆至靖康,无为集>

钦定四库全书

无爲集卷十二 宋 杨杰 撰

碑志

故武信军节度使諡康简追封循国公神道碑

宝元二年秋七月辛丑宗室金紫光禄大夫检校礼部尚书使持节和州诸军事和州刺史充本州团练使兼御史大夫上柱国天水郡开国公薨於秦邸之正寝上闻之震悼车驾临奠亲抚衾敛哀恻久之慰恤诸孤恩礼加等赠武信军节度使追封循国公特赐白金三千两缗钱一百五十万绢五百疋命使监护及遣内省夫人中贵恤治内外事用度悉出於官太常用一品卤簿仪卫以送丧物窆於奉先佛祠诸子号慕过哀乞庐其侧至某年某月某日葬於某州某县某原礼也太常议諡以谓公质直重厚志尚敦雅下贤趋善素履安夷和柔之德中外推挹案諡法曰温良好乐曰康平易不訾曰简尚书省集官考覆輿论爲允乃諡曰康简易名之典兼二法之美也公讳承庆字佑之初名承宗宣祖皇帝之曾孙太师尚书令秦悼王讳某之适长孙护国军节度使兼中书令高密郡慈惠王讳某之适长子也公天资忠孝才艺超卓器识宏远信厚恺悌世以贤公子称之雍熙中随侍高密王出判济州淳化二年奉宣补衙内指挥使每入贡至京师太宗必召至禁中询访州郡风俗山水应对详敏莫不称旨因改今名乃授西头供奉官时济州圉圉屡空监郡刘蒙叟敷奏上喜顾左右曰承庆父子晓事尽心公家因赐金箱玉弓二宝带以宠之济州举人程文应格者多高密王欲尽荐於朝有司以解额难之王曰贤者太平嘉瑞文王以多士宁周荐贤乃诸侯之职於是具奏尽数贡於春官至今济州荐送之数比旁郡爲优自高密王始也公与有力焉孔子曰听讼吾犹人也必也使无讼乎书曰野无遗贤传曰孝子成父之美公父子见之矣真宗皇帝祥符四年扈跸汾阴改东头供奉官七年改内殿崇班恭谢天地礼成加银青光禄大夫检校太子宾客兼御史大夫骑都尉十八年上王皇尊号加金紫光禄大夫改内殿承制天禧元年合祭天地加天水县开国男食邑三百户二年秋八月立皇子昇王爲皇太子授内园副使三年南郊加检校左散骑常侍进封开国子加食邑三百户乾兴元年二月皇帝御正阳门加食邑三百户上因曲宴谓诸宗室曰汝等在先朝所历事节宜各尽所见奏闻公曰先朝事节备於政要臣尝扈从车驾封太山祀汾阴朝谒陵寝幸亳社巡守澶渊以至大酺可谓盛事皆所亲见上曰更记内家甚事无所讳避切欲闻也公曰容臣退而编録上进旬日具所见闻进呈御札褒称仍许非时上章公於朝政所补非一而其藁不存於家其慎密如此传曰古者造辟而言诡辞而出公之谓也车驾幸後苑赏花钓鱼翌日宗室入谢上曰卿等赏钓乐乎衆曰甚乐公独曰臣一忧一乐左右皆愕然失色上曰大王何所忧曰臣昨日伏见御幄临渊侍从数百人侧立危栏之上臣不敢不忧既而龙輿回轅赏花宴集上下同驩咏歌太平时当丰稔和气充塞臣不得不乐上顾近戚

曰大王爱我如此卿等可学即命取白罗扇御飞白书承庆佑之四字以赐焉夫危楼船以忠谏汉史称之宠华袞以褒字鲁史载之公有临渊之忧帝有书扇之赐忠以爱君褒以劝善君臣之道可谓尽矣它日宣射上曰先朝多以卿爲神射今日期必中鹄公曰臣实无能偶或有中公拜命发箭虽不出正然皆不敢近鹄上知公之谦抑乃索御箭连中鹄是时御双箭处中央公双箭在下正上下相向端直如?墨瞻者莫不叹仰帝甚悦赐对衣金带鞍辔马各二诏书褒异之诗云终日射侯不出正兮易云劳谦君子有终吉公得之矣仁宗皇帝即位授内藏库使加轻车都尉封天水郡开国侯食邑三百户天圣二年恭谢天地加上轻车都尉五年十一月南郊加护军食邑三百户七年九月朝廷敦叙昭武之裔优推宠命以公乃宣祖皇帝之曾孙秦王之适长孙高密郡王之适长子故特持节蒋州诸军事蒋州刺史八年南郊加上护军进封开国公食邑三百户明道元年改宫苑使检校礼部尚书加柱国二年三月东郊籍田加上柱国食实封一百户是岁特授怀州刺史景佑元年公以足疾赐告调治二年南郊迁和州团练使加食邑五百户宝元元年南郊加食邑食实封二百户公养疾六载圣睠益隆既宣太医朝夕诊疗又时遣内夫人至第抚问非常礼也章献明肃皇太后临朝时以公名下一字犯彭城郡王父名欲令改易遣近侍谕之不从一日召於帘前宣问公曰彭城王讳天下所共讳也臣不敢不讳彭城王父讳非天下所共讳也臣不敢独讳且臣名先朝所赐安敢私易以谄上识者义之公生平博览坟典翰墨精妙以至乐律丹术仙録莫不洞究尤善属文尝注易二十卷极天人性命之理天子览而嘉叹赐以金币又着家训三卷行於世国朝以来宗室着述自公始也因真宗违豫公刺血书佛经以进高密王寝疾不脱冠带而养上闻之遣内人抚问厚赐以旌过人之行及扶护先王丧往葬汝州会天旱井涸公夜致祷明日乃水泉涌出赐诏称其诚孝之应经曰事亲孝故忠可移於君孝悌之至通於神明於公见之矣公享年三十有九夫人涇阳郡君乃中书令和凝之孙也繼室永嘉郡君虞氏皆贤懿有辅佐君子之道子六人曰克悟右班殿直早世曰克继赠定武军节度使开府仪同三司建国公曰克绶赠青州观察使曰克孝今任越州管内观察使曰克肖赠右监门卫大将军曰克顾赠昭化军节度使女十人封号不同各归显族一早世一爲比丘尼孙几人曾孙几人任某官公教子不以爵禄爲重而重乎忠孝不以货财爲传而传以经术是以太宗朝诸王出镇藩郡以公父子爲才能真宗访政事公献忠言爲多仁宗试文翰诏称公子克孝秀出本支英宗立宗学教育亲族克孝首爲二宗师儒称荐而复中上科神宗朝克孝着孝经传上进赐诏称谕熙宁以来诏试宗室经术公孙叔敖叔象叔某叔某相继登第元丰讲行祀典择宗子之无过尤者躬执事於明堂宗庙是时循国子孙与祭者爲最多议者以爲无是父则无是子无是祖则无是孙予观循国康简公家训三篇上篇述祖考昭穆之序陈忠孝礼义之端集古人法语以爲家世之传中篇笃励学问慎修言行重道义而轻富贵下篇言所慎在乎九思正心以正身正身以正家仁而尊贤恕以及物具善不善之积明德不德之效於今子孙不忘其训然後知义方之教泽流之远何时而有穷已哉葬後四十年公子欲以公之善美昭示来世乃具行实请文以立碑於隧道铭曰

於戏循国宗室之英忠孝仁厚恺悌信诚博学多能秉彝典经左右先王政肃刑清进贤报国邦父以宁锡以宝带父子宠荣谏章慎密圣主从?劳谦终吉射不出正天旱井涸葬亲汝城精祷泉涌感於神明天子闻之诏褒以旌曰康曰简懿哉易名治家训言载之简编貽於後昆忠孝之源公子公孙世其称贤宠禄令问传无穷年

故右谏议大夫赠工部侍郎沈公神道碑

沈氏之先出於周文王之子聃季食采於沈因而命氏汉光禄勳戎徙居会稽之乌程後改乌程爲吴兴郡故沈氏以吴兴爲望由汉以来世爲右族宋有庆之梁有休文至唐润州司兵参军岌生愉爲怀州都团练判官愉生僎爲同州冯翊尉僎生师举爲太常协律郎师举生籍爲衢州常山令讳籍即公之高祖考越州剡县丞讳德饶公曾祖考也海州朐山令讳仁谅公祖考也赠工部尚书讳平公烈考也太夫人胡氏封安定郡太君自朐山令徙居历阳今爲历阳人源流深远庆德相承笃生良臣器识宏博公讳立字立之少孤力学事母至孝鞠育诸弟率以懿行乡闾耆艾推以爲法文词敏赡场屋有时名天圣中登进士第历任桐城尉畿县主簿知绩溪洪雅二县通判寿州益州知池州杭州越州江宁府宣州沧州入爲三司户部盐铁判官判都水监知审官西院出爲淮南转运副使两浙京西河北都转运使充江淮两浙荆湖六路都大制置发运使提举商胡扫提举崇禧观以老焉由大理寺丞殿中丞太常博士历屯田都官职方三员外郎兵部郎中太常少卿集贤殿修撰右谏议大夫赠工部侍郎公自初仕已能夙夜勤职廉义自持孜孜民事以报国家故所至郡县爲部使者皆以才称公尉桐城盜不入境主畿内簿吏不敢欺治小邑皆兴学舍在商胡采摭大河事迹古今利病曰河防通议世之治河者取以爲据尝遇苏湖大水民多艰食公爲发仓廩出余财选择部吏分主赈贷时诸县有率大姓出粟爲助者公曰官廩充牣乌用扰民悉还给之若积粟之家能自贷借下户者候其丰岁官为理偿民以爲便存活甚衆初领朔方漕陞辞曰英宗皇帝曰知卿用心公家故召卿经画边事慎勿张皇公遍历边郡经度处置人不以爲疑盖能承上意也公总外计旧号冗剧施設皆有条理於是纲吏絶侥幸之望疲兵无冻馁之苦金帛丰美仓廩充溢天子闻而嘉之因奏计上从容慰谕云知卿素有才力更宜爲朕用心及存问家属诸属子次第续遣中使赐中金二百两以优其劳镇金陵日上曰以卿清慎公勲故以重地委卿问所藏书令进所编名山都水记三百卷并家藏书目乃赐诏书敦奨公爲北朝正旦国信使是岁契丹行册礼遣侯介曰能同北朝百官之服则入见不尔当叙班门外公正色曰远衔君命以通两国之好安可门外见耶顷者迓北使到阙会本朝元会之礼亦未尝命北使易衣冠常礼不可遽易敌人无以答遂以常服入焉使还赐金紫旌其不辱命也公尝撰茶法易览具述茶之利害於今着以爲令熙宁二年当转对力言邪正治乱之道语甚切直识者知其所存公事三朝白首一节生平乐经史手不释卷自奉甚约其稍廩之余皆供纸札之费故藏书埒於内府累降中旨就其第传録以补官书之阙自元献晏公而下卿士大夫有歌诗序记百余篇以美其嘉尚既退归历阳尝曰吾起家寒素仕宦至两省藏书三万卷以遗子孙年余七十而支体康宁是无一不如意也唯日与宾朋诗酒爲乐所着名山都水记茶法易览河防通议盐策摠类贤牧传稽正辨讹香谱锦谱泊文集共四百卷公治家有法度教子有义方故内外雍肃诸子笃学所至有能声皆其善教之致也娶夫人吴氏封濮阳郡君继娶夫人董氏封仁寿郡君男六人长安国次安民早卒次安道次安上次安节次安礼女四人长适进士朱延之次适宣州旌德县尉曲师德次适秘书丞裴维甫次适濠州司法丁源并早卒孙男十四人庆孙寿孙孝孙并试将作监主簿余尚幼孙女三人公既薨枢密直学士钱公爲铭以纳於圻中其後乡人耆旧怀公之德过公墓下则肃然致敬其孤请予文以书於碑其铭曰

沈氏之源濬於吴兴会稽东阳令闻继承逮於朐山政肃典刑德积庆余我公以生起家文儒

策科帝廷筮仕旬畿夙夜靡宁宰牧观风若权在衡进秩侍从始终不倾会计外内转输富盈孝友於家接物信诚利在邦国爱均编氓典领都水濬治有经民乃奠居以耨以耕审官进贤公哉黜陟奉币出疆煜煜旄旌华服不易宪度是凭不辱君命正色北廷书载史官炳然丹青功成愿归请符金陵天子曰嘻诏其屡登昌言啓沃袞章其荣惠浹政行镇移宣城囊封乞身挂冠林垫天子念劳嗟其颓龄俾奉琳宫燕闲紫清归老历阳锦绣耀荣稚耄驩呼豆觴出迎公还旧庐乐康且宁书三万卷充屋架楹以示子孙不传金籙寿乎有穷不朽者名民怀其德烹牲荐馨道左丰碑信辞是铭

故通议大夫慎公墓志铭

公讳曷字仲素为吴越着姓後居三衢曾祖讳知礼工部侍郎赠左仆射祖讳从吉给事中赠工部尚书父讳钧大理寺丞赠尚书屯田员外郎尚书娶钱氏忠懿王之女公其长子也初命试秘书省校书郎迁国子监主簿太常寺奉礼郎诣阙上书赐五品服历卫尉光禄大理殿中丞国子博士入省为库部水部司门员外郎迁三部郎中知婺州通判邵州擢知楚州海州以嘉佑四年夏四月戊子终於山阳享年六十有三至七年秋八月归葬於开封府开封县苏封之先莹夫人冯氏先公而终铭以耐焉公初守婺素无兵备交趾蛮僚数百人暴至城下城中扰攘计无所出公曰贼势方鋭守与战皆不可因设疑兵被甲持满传呼开城门金鼓大作贼望风遁去使者上章称之赐金紫邵有谿洞酋首龚行详者恃险恣暴前後吏莫能禁公通守是郡命捕以戮内外畏服公廉正自持不妄喜怒其貌甚温临事毅然有不可犯之色守山阳以母丧去官富人以重币爲贖者公曰吾家以清白相传急持去无污我仕宦四十年及终无负郭之田环堵之室以遗其子孙人以爲难枢密田公况内相王公洙知公甚深以爲其才可备台省力言於朝其後名臣交章荐举自二公始也子男三人宗杰见任朝奉大夫才识公廉有家世之风自升朝累赠公至通议大夫宗道宗海有学行皆早世女子四人皆出适孙璣太庙斋郎修洁有文早世大夫以铭见托铭曰

慎氏之源发东阳三衢分秀派益长祖祢显仕炜有光通议入省为名郎应机破贼保土疆屏恶扶善称循良传家清白着义方子孙承继百世昌

故通直郎签书商州军事判官厅公事谢君墓志铭

君讳季康字和卿其先河朔人世力田高祖讳鳧始以儒学自立晋开运中明经中第至周任瀛州録事参军赠国子博士曾祖讳成之皇朝任屯田员外郎赠主客郎中祖讳师顔都官员外郎赠吏部尚书父讳?朝议大夫三世皆进士及第自主客游宦京师寓居颍昌之阳翟後为阳翟人宋元宪景文文章学术为天下宗师女弟临洛君博学能文贤而有识君之母也知其子可以托门户临终以属舅氏元宪元宪亦素爱君孝友介洁每谓人曰真吾甥也及在政府奏授秘书省正字非所好也与其兄公仪熙序益勤於学偕有闻於时久之调徐州司户参军海州司法参军君为掾常以法自持未尝少屈於权贵闻者危之而志不可夺用荐者移胸山令丁继母陈夫人忧执丧尽礼服除授西平令通山令改大理丞监大名府经城酒税会官制行迁通直郎签书商州判官?公事时朝议高年君愿解官就养朝议固止之君不忍去膝下迟

迟其行宛丘太守周革谓君曰尊君年虽高而康强过人君家贫族衆当勉力从仕以承亲意安可衣食於亲以就养乎君不得已而之官及亲有疾即解职归谒未报闻讣至僚友知君之贫有以资其行者君力拒不受奔丧哭不絶声水浆不入口者累日既克葬後三日而卒即元丰六年十一月二十三日也享年五十有七君幼而好学弱不好弄行已清直事亲孝恭朋友尚信莅官守正不爲势屈命虽数奇未尝谄以事上家虽甚窶未尝躁而有求故所至有令闻朝廷大臣如太师潞国文公翰林侍读学士刘公枢密直学士陈公皆深知君之所存前一夕其弟文瓘梦君彩服簪绅曳履袖文书以告之曰予平昔之事汝其为我着之逮旦君逝矣娶刘氏屯田员外郎异之女有子五人长曰收中进士甲科河南府推官次早夭次敷次攸次敷皆力学遵义方之训女二人长适渭州华亭县丞刘逢明次适进士方增孙男一人以元佑八年四月二十四日卜葬於汝州郟城县安良原先茔之次礼也吾友太中大夫致仕宋盈祖乃能道君所存求予爲铭铭曰

行过乎恭丧过乎哀观而知仁斯贤人哉

无爲集卷十二

卷十三

钦定四库全书

无爲集卷十三 宋 杨杰 撰

墓志

故刘之道状元墓志铭

之道讳辉信州铅山人也少丧父母耻家世湮汨慷慨去乡里卓然有自立之志从师学问八年有成一试冠国胄再试冠天府士天下以是知名嘉佑四年春仁宗皇帝试礼部贡士於崇政殿又擢之道爲第一先是皇佑至和间场屋文章以搜奇抉怪雕镂相尚庐陵欧阳公深所疾之及嘉佑二年知贡举则力革其弊时之道亦尝被黜至是欧阳公预殿廷考校官得程文一篇更相激赏以奏天子天子称善乃啓其封即之道之所爲也由是场屋传诵辞格一变议者既推欧阳公有力於斯文而又服之道能精敏於变也释褐授大理评事签书河中府节度判官事迎侍祖夫人赴官夫人以生於南方不习风土间或不怿之道曰乃某自立志在显亲不幸少失怙恃追养不迨尚幸祖母康宁得以承其志今反志意不怿岂子孙之心也哉遽白府请解官侍亲府爲具奏诏移建康签书节度判官事所以便其养也未几改著作佐郎七年夫人卒之道号慕尽哀以适孙自陈乞解官承重服时府尹龙图王公贻重惜其去而固留之之道固不从公即遣使者谓之道曰按着令凡适孙爲祖父母承重者盖其适子无同母弟以承其重者也今君虽於祖父爲适孙而闻先君有同母二弟已自服丧奈何遽以解官而承重服乎使者及门之道方伏庐哀号徐扶杖而起谓使曰辉闻支子不祭祭必告於宗子所以重正适而尊祖考也後虽未能尽蹈典礼而丧事敢不勉乎况国朝封爵令文诸王公侯伯子男皆子孙承适者传袭若无适子及有罪疾则立适孙无适孙则立次适子之同母弟且贵贱虽殊正适之义则一也岂有处贵者之後则封爵先於适孙在凶丧之际则重服止诸叔父耶爲我重谢龙图公母固留也公以其事奏朝廷朝廷下礼官议以爲然乃听其去有国以来适孙有诸叔而承重者自之道始也扶灵归葬於乡里哀慕尽节州闾称其孝会数世族人有贫而不能为生者乃买田数百亩以聚之晨昏岁月飧给周足县大夫爲易其地名曰义荣社之道居丧未尝一造郡县四方士人从学者甚衆乃择山溪胜处建馆舍以处之日讲诵乎其间县大夫又名其馆舍曰义荣斋皆所以厚风俗也服除赴阙道繇真州以治平二年春三月十有三日感疾而卒享年三十有六祖讳某父讳某皆隐德不仕之道性和易接人必尽诚不尚矫饰士乐与之交供备库使白君文质以其子妻之男一人女三人皆幼夏四月其季父自铅山来当涂且曰吾家犹子与子有年籍之契而校诚尤厚昔以先伯氏之铭托於子矣吾家犹子亦尝为濡须府君之铭矣今将卜某月某日葬於义荣斋之右子其爲我铭之乃泣以再拜杰再拜以泣曰敢不从命乃为铭曰

琢玉为璧璧成而缺琢玉爲圭圭成而折厥宝至重不获其用呜呼之道不得寿考

故朝散郎致仕朱君墓志铭

君讳定国字兴仲姓朱氏其先成都人世仕伪蜀高祖贊金预吏选从曾祖某典宫门之禁随孟氏入皇朝终京西转运使自是族人东徙曾祖询祖益皆自晦不仕父杲故任孟州河阴县令累赠银青光禄大夫母傅氏累封清河郡夫人银青蚤世清河夫人挈诸孤寓无为郡之庐江君方八岁家贫借书读兄弟自相传授敦尚节操不妄与人交庆历二年中进士第授池州贵州主簿以平反死狱迁饶州军事判官时太守暗酷政出其子官更多惮之君曰公则从不公则不从何惮之有守屡欲害君君方正自持终不能屈浮梁邑剧讼多吏贪令弱部使者委君摄令事君至而锄其奸境内称治於今称之官满当改秩铨吏曲为沮抑刺荐不如令君诣铨长求直长固执如吏议且曰在官曷不多求荐君曰平生未尝有所求必以爲不可则已乃调梓州观察推官改着作佐郎知广德县民有诉旱郡遣官按验民乃聚衆持挺千余来覘势若胁官吏太守戒捕盗官具甲兵以卫之君曰愚民无知妄意蠲赋尔若过计张皇恐因缘生事县令请自行於是轻骑从者数人以往衆闻乃溃去时按田官尚匿僧舍不敢出君擒首谋数辈送郡黥隶之余不问也人服其识境内有灵济王祠江左人钦事岁杀牛数百以祀之君至且戒止民未甚信父老告於廷曰神祸福影响苟易其牲何以逃咎君曰牛者稼穡之资杀有常禁神以庇民为惠将?民有罪而享其牲神必不然父老益惧君曰民欲杀牛而享不听者令也神之福宜归民谴宜归令必欲用牛当生致於庙廷官为贸钱以备祠费父老欣然从命广德不杀牛以享神自君始也未及代丁清河忧服除改秘书丞知庐州合肥县神宗登极改太常博士赐五品服改尚书屯田员外郎知六合县时朝廷方兴水利有建议开马昌河通滁州者提举官从之君以为坏民田庐甚衆工费亦大而所为利无几固以为不可乃移君他局屡委官覆视之不能变君议使者以君首沮所论数移他局以困之君因请於朝愿得管库以便其私而他使者知君奏留不行君叹曰居可以仰禄而不知我者数见困去可以远害而知我者反见留吾命其穷哉直道以利民殆不可为枉道以全身非我志也因请致其政而归时年六十有一齿髮未衰筋力犹壮士大夫高之元丰四年官制行改朝奉郎今上即位覃恩改朝散郎赐三品服着令京朝官致仕历任有劳绩则以全俸宠之公以贵池雪活之故可应格或劝君自陈君曰吾勤劳?事夙夜匪懈犹惧无以报廩禄之赐今窃半俸老田里又得一子禄养恩已厚矣敢较其他乎竟不言以元佑四年七月初一日終於私第之正寝享年七十有九娶王氏封太原县君子男三人长曰裒寿州寿春县令先公一年卒其二人皆早丧女三人长适乡贡进士建安张思次适通直郎延平叶唐懿次适阳武主簿太原王滂孙男三人长曰耆次曰某次曰某女孙二人尚幼以是年九月乙酉葬於临潜乡申家山之西近先莹也君质直信道笃於孝友所至以公廉称言行庄重非义者惮之至老手不释卷凡论汉魏以下至国朝人物贤愚忠佞言之迹历历可听尤好为诗喜愠悲忧一於诗发之格尚平淡在编轴者数百首着归田後録皆耳目所接朝野可载事以备史氏之遗士大夫多传之又取近世祸福之应其理可推者百余事次之以警俗谓之幽明杂警云君初与其兄巢门先生某及其弟秘书丞某皆以文行清节着闻至致政时巢门先生尚康强兄弟白首文酒相从於乡里者二十年搢绅慕焉铭曰贤哉兴仲谅直自守笃学从仕材不命偶听狱求生宜其有後祠牛不烹利溥且久知止不辱勇於解绶浩歌归来兄弟耆寿燕乐田里益敦孝友道有通塞名也不朽

故桂州司法赵君墓志铭

君讳隆字夷仲河南洛阳人曾祖考讳孚皇任殿中侍御史赠太师中书令祖考讳安仁皇任御史中丞尚书右丞兼宗正卿赠太师尚书令兼中书令魏国公諡文定考讳温瑜皇任少府监赠吏部尚书家世以忠孝德义相传荐绅推以为法君盖尚书公之第三子也庆历元年用奏补太庙斋郎皇佑三年调江陵府户曹参军秩满丁尚书公忧嘉佑四年再调曹州司法参军治平元年移绛州稷山令未之官丁母赞皇郡太君李氏忧四年以三司户部判官张徽举监泗州在城清酒务熙宁五年任婺州浦江令爲政明恕不务苛细邑人便之时浙右大歉君赈恤有方而民赖其赐元丰元年以兄大夫公领宪湖外疆境近於桂管乃调桂州司法参军二年十一月十二日无疾卒於官享年五十有五君幼而聪敏长而好学其恺悌孝恭盖出天性内外亲友无不爱之平居宴然不妄喜愠家虽贫而廉於求官虽卑而恬於进人或勉之君曰富与贵人所欲也不有义命欤议者称之君雅爱篆学乐於吟咏然未尝辄以示人故知之者鲜尝谓弟曰吾平生不敢为恶得免疾苦而终幸矣後果如所言娶吴氏大理评事谅之女男五人涛淳源淮蒙举进士涛淮皆先君而卒女三人长适进士李峒次适进士刘载用一在室元丰四年冬十有一月某日葬於洛阳龙门某原祔尚书公之莹礼也诸孤托彭泽令张在述君行状求予铭其墓予忝葭莩知君懿行为最详义不得辞铭曰

孰不欲富吾廉於求孰不愿进吾敏厥修有义有命诚心所存吉士夷仲文定公孙

故临淮隐者赠大理评事杜君墓志铭

某年月日临淮隐者杜君卒有德而不自显之谓隐孝以事其亲顺以事其长正以率其家义以教其子惠以及其乡君所有之德也淮水之南淮山之北乔松修竹白云寒泉君之隐居也既有是德而不自显矣则朝廷曷得而官之以其子而显也君讳某字某其先君卿在唐为濠泗等州观察使因家於临淮後遂为临淮人君之曾祖某官讳某祖某官讳某父某官讳某皆积德行义有闻於时君寿六十有二夫人朱氏贤和而孝能辅成君子之德赠某县太君寿八十有六而终子二人曰某曰曷曷举明经中第清慎贤明为荐绅推重以太子中舍辞知彭山而为金陵庾官所以便襄事也嘉佑五年得告归以冬十月某日卜葬君及夫人於临淮郡之某乡某原且以铭志见托不获让云铭曰

淮山峻极君德之积淮水汤汤君庆之长山水之间以固以藏

故邹君墓志铭

君讳澥字深之其先东鲁人源深派远後有徙居临江郡之新淦者大理评事讳显曾祖考也府君讳袞祖考也袁州助教讳夏考也信义相传闾里以为令族君幼业文长益精博为流辈所称屡举进士不为有司知既孤以至孝事其母晨夕不敢离左右一日谓人曰士不可以不求进进而不为人所知命也安能舍予采衣之乐而汲汲求知於人哉乃罢进取一志於养就所居之西临水面山为采真阁每侍亲登览燕集其上佳木繁翠野芳幽芬烟云卷舒鱼鸟上下真得天下之至乐与夫奔趋禄利汨没尘土不得朝夕在於亲侧者盖有间矣平生介洁屏耳目玩好唯乐聚书力教诸子以大其门熙宁元丰中天子兴太学长育天下英才君敦遣其

子以就教喜谓族人曰此吾儿亨进之时也及其子自太学登第归闻者莫不服其高识君谨厚寡言宽恕容物未尝矜已所能扬人之短亲戚交旧赙给不匮人有患难则力以济之唯恐不逮乡闾以长者称之人有劝多营田园以厚子孙计君曰田园之利孰若义之益耶人以为摯论元佑元年正月一日感疾终於家享年六十有八娶廖氏生男子三人曰洵仁洵武洵美皆举进士有学行洵武先登第任鄂州司户参军女一人适乡贡进士吴游宗廖氏亡继室陈氏孙一人女孙二人尚幼以某年月日葬於某乡某里某山之原其子具书以江夏谢令岐叙君行实自江东走介来京求予铭其墓云铭曰

仕不可必退以修身孝以见志笃於事亲诗礼之训肃雍闺门善积之庆以貽子孙

故西头供奉官监无为军榷货务兼兵马监押郭君墓志铭

君讳元方字天益唐尚父汾阳王之後今为京师人曾祖考讳彦钦谨厚有器量艺祖少时善遇之而有通财之义及艺祖龙兴故人多暴贵而独隐遁不自耀特诏起之後任庆州刺史榷盐使逮事太宗防边屡有功所至称治祖考讳勲补都使不乐仕宦老於家考讳坦知宁州不禄赠大将军妣刘氏封彭城郡太君继母向氏封钜鹿郡太君君好学多能少而有立初举进士未第而将军没於岭外朝廷推恩补殿侍景佑中改三班借职董役河上有绩效宝元中任蕲黄按辖马递及州界巡检权本州兵马事屡获强寇改奉职为制置使奏辟监潭州船场权本州兵马事本路使者举充桥口水陆都巡检庆历中蛮獠寇境荆湖南路安抚使选用君於衡州耒阳山下分领援兵策应擒捕君靖深有谋上下赖之及凯旋授右班殿直续改左班朝廷选送辽国人皇佑中任宿州蕲泽兵马监押获盗及逋卒百人境内肃然种榆柳三十万河堤为之完固荐者称君之劳首冠诸邑被旨陞优最嘉佑中三司奏辟监无为军榷货务兼兵马监押时茶法久弊课额大亏及君赴官究思弊源招徕商贾未周岁常数大增其溢额者五十八万緡贼盗屏迹邦人安堵会茶法通商罢榷货务邦人投牒本部愿留君专领兵马事官满将去邦人又请留之本部为具奏朝廷皆见允连任十年改左右侍禁西头供奉官生平荐者自丞相刘公而下三十余人皆当时名公也治平元年三月六日感疾终於无为官舍享年若干夫人李氏贤淑有法度亲族称之男子二人长曰昇次曰曦皆应进士举二女长适左侍禁张宏次适供奉官戴招信君性和易临事精敏奉亲笃孝兄弟友爱其擒凶御寇则有过人之智遇人急难则力以济之蓄书数千卷以教其子弟好藏古今名书画及珍异之玩每延嘉宾客则出之燕间喜於丹青遇物能写曲尽飞动之意信天下之絶笔也宣徽王公泊诸文士多以序引歌诗纪其妙君所至有劳效而不得尽其施設知者惜之元丰三年某月某日卜葬於泗州盱眙之三角山其子昇以铭来请铭曰

汾阳裔孙镇宁嗣子慎以行已敏於立事寇盗屏畏民以之赖职业允修去有遗爱盱眙之山下有流水以固以藏百千万祀

故朝奉郎守殿中丞梅君墓志铭

君讳正臣字君平南唐末曾祖远为宣州掾祖邈赠尚书刑部侍郎父让赠尚书职方郎中从

父询景佑间任翰林侍读学士给事中遇郊祀恩奏试将作监主簿时方力学鋭进累预乡举以亲长之命不敢辞也始调舒州怀宁县尉次歙州绩溪尉秀州嘉兴尉以劳迁和州防御判官君所至以公忠自信慷慨敢为於舒修完吴塘陂灌溉民田数千顷人以为利秀之华亭有盐数十年积若山阜不能发君请疏渠因海潮运载至城下公私便之军贼王伦聚党数百自青沂至淮楚长驱寇掠州县为之骚动时历阳守倅未到任君独当郡事迎送之余疲卒才数百辈计不足以御贼君乃募土着丁壮相与誓死守城力战於是伦及其党皆就擒伏诛若其胁从者并从寛宥时文忠欧阳公守滁闻之顾谓僚佐曰伦长驱郡县梅君平於谈笑中擒之其材智岂易得哉因辟充幕官郡事多得其助官满以文忠公威敏孙公枢密直学士王公洎部使者十余人交荐於朝廷迁秘书省著作佐郎知广德军广德县事未几丁职方公忧服除知宣州南陵县事南陵素号多讼田制不明君至先爲造版图正经界吏畏民服囹圄为空改太子左赞善大夫还朝改殿中丞至和初京师久雨畿内诸县水潦为害朝廷择官分治之君首被选用乃自陈留以东昼夜冒雨行数百里相视决泄人无垫溺之患比它治为最优出知泗州临淮县事至则修教令立威信盗不入境明年谷不登未及赈济而污吏欲以恶湿麦数万石散之民间约一岁而敛之君以其实白於部使者愿无以此麦挠民且惠奸使者以为然乃接受纳之弊其不悦君之言者阴使人讼君催科苛酷遂被劾去官时母夫人年余七十自侍奉还乡里日与诸亲戚相见志意愉怿胜在它郡时君乃谓所知曰我从仕以来多承命出入不得在亲之侧常不足於所怀今亲且老矣安敢以游宦为意哉於是缉治先构凿池种竹手植花果百余品日引儿孙奉版舆嬉乐於其间不知外物之可欲也比终母夫人丧即年及从心矣遂不再仕识者称之君性冲淡学问赡博少时与伯氏圣俞唱和诗章为前辈所推自退居以来杜门燕闲唯以旨甘爲事未尝以纖毫干於人其所为文词亦未尝轻示不知者其耿介如此君虽高年不倦探讨因其子得书数百卷归而喜过於获珍且继昼夜以读之不踰月而终篇其好学如此元丰五年中元日终於家享年七十有九先娶卫氏再娶王氏得辅君子之道男子二人长曰宰任承事郎知江宁府江宁县事次曰衆累举进士有司优第其文女子五人长适凌湛次适朝奉郎通判杭州李孝先次适江宁府溧水县尉王良肱次适曲孜次适杜炜孙男七人京充端雍亢章襄方幼学以元丰六年正月丙午葬於宣城县长安乡惠照之东原是月遣其外孙前知南陵县事王监具行状来求铭铭曰

梅氏之兴盛於宛陵自金华公世以文称嗟嗟君平慷慨敏明交荐於朝钜公名卿诛灭寇党胁从罔治分决积潦首称其利完陂灌田人蒙其惠乘潮疏漕运以之济晨昏庭闈承顺志意轻禄重养孝子之事心无所欺退亦何愧刻石墓门昭示来裔

卷十四

<集部,别集类,北宋建隆至靖康,无为集>

钦定四库全书

无爲集卷十四 宋 杨杰 撰墓志 行状 表述

故温州録事参军陈君墓志铭

元丰四年六月甲子前温州录事参军陈君卒於丹阳郡明年其子乡贡进士诚自淮南来京师以永嘉太守石大夫牧之所撰君行状来求铭於予固辞不获乃叙而铭焉君讳某字几道其先开封东明人曾祖某黄州军事推官祖某广州南海令父隐德不仕君幼学强记日诵千言年十八以专经预乡选後改应进士举不第时侍讲曾公侍读杨公以君故人子谨畏习楷法因辟掌编录经筵义及终经奏补九品官初任南巢主簿邑事赖焉再调道州司理会依贼叛广南它境或失守人心不安乃建白郡守请集丁壮完城壁濬堑教以旗鼓号令张大军声以伐贼谋守从之後贼党至桂阳境上畏而不敢前民乃安堵太守贻诗以称之及官满民惜其行去郡数程遇溪水湍急舟艰於进忽数十人操篙引絙以爲助君怪而问之曰我道民也邦人荷司理之德久矣辄以为报尔其爱之如此再调汀州司理参军宁化军有盗六人持畚刀夜刈人禾田主逐之五人逸去其一独留且杀主人邑官全获以为六人皆强盗也狱具将就诛君曰持刀窃禾志不在杀也畏主人而去者与独留而杀主人者异矣安可无首从以用刑邪初虽议论异同卒如君议遇今上即位赦五人者皆原独为首者移乡部使者泊守臣叙其事以荐於朝除姑苏录事参军苏民有负公府钱自牖出刺杀吏者度其不可免乃行赂以族弟代之君听狱能正其罪岁大凶君承郡命赈救有方全活者衆君历宦三十年终始如一有知己二十三人其生平所为可见三任自温州罢官将就升迁而不幸不得遂所愿享年七十有子五人曰识诚谥諱皆力学从义方之训中子曰诩出家於钱塘之净慈为比丘四女皆有所适孙男五人孙女三人尚幼以某年月日卜葬於无为庐江某原铭曰

治狱阴德可貽後昆斯言不欺当高其门

故仙源县君陈氏墓志铭

温陵吕君升卿明甫之室仙源县君陈氏泉州晋江人故广南东路转运判官驾部员外郎讳从益之女聪明仁孝其质夙成甫十余岁父母器之委以家事措置指画皆有条序既归吕氏吕大族也内外百口夫人恭事调睦夙夜不懈舅姑安其孝夫子谐其顺娣姒尚其和宗族称其钦媵侍怀其仁家人上下莫不宜之熙宁六年明甫出使京东夫人侍其姑自淮淶还京师在道被病与明甫遇於宋城明甫为留医治之数日疾不损夫人瞿然起曰子衔命出使王事也不可以妻故而淹上新擢子恐忌者得以藉口明甫怜其意即日为命驾既诀怡然谓明甫曰勉力使事勿以家为恤度明甫行且远即呼其儿女泣告之曰吾疾殆弗兴尔父方远使惧

罹其忧弗敢以情告也竟以其年八月二十九日终於京师享年二十有八前死三日命屏去男女正容默坐凡平时心愿口诺及有贷於家人者一毫不忘使其子书识之曰以遗尔父为无恨矣夫人笃信释氏诵其书遵其教精进持其所闻禅宗顿教见性成佛思而索之寢食都废一日忽自喜曰吾得之矣未几被病以故临没不乱夫人之死行且十年矣明甫为之未忍娶诸姒迄今言及之则为之涕下所以感人心者如此其贤孝可知已熙宁七年明甫为太子中允直集贤院兼崇政殿说书管勾国子监遇郊祀追封夫人为仙源县君有子四人男曰洪曰洞曰洋女一人在室洋出继元丰三年五月其姑扬国太夫人杨氏薨以明年某月某日葬於扬州江都县崑岗之阳明甫自丹徒举夫人之柩从葬於其兆谕予以铭铭曰

巍巍崑冈其来万里右旋左抱一伏一起博大深厚截然而止长河钜江前有吉水苍苍远岫如帙如几夫人从姑归安於此幽宅永康百世蒙祉令闻不忘视兹志已

故福昌县太君李氏墓志铭

福昌太君李氏左朝议大夫上柱国会稽县开国子食邑五百户赐紫金鱼袋夏公伯孙所生母也太君京师人幼失怙恃世失其传以良家子婉淑端庄善言懿行闻於闾里乃归侍於司空是时文庄公位兼将相荣国夫人肃治闺阃唯司空一人以承家事每以嗣裔未广为念太君承上接下靡不得其懽心及生朝议喜气溢於家庭相国荣国尤所鍾爱暨相国薨司空执丧过哀殆不能胜太君供侍持扶未尝违去左右乃克终制太君之勤为最多朝议幼而诱以学问长而勉以政事君亲教以忠孝行已笃以信义可谓尽母道矣故朝议历仕宦近五十年无言之过者有所自也朝议平生不求外官以太君不欲去京师故也以元佑六年八月十七日年八十有五以疾卒於家朝议遭太君之丧号慕过哀水浆不入口者四日相继而终母慈子孝闻者哀之太君和易诚实未尝失色於人疾病急难必援救之唯恐其後至於仆执贱者莫不均爱焉况其子孙乎况於姻族乎孙十有四人长忱次恠皆承议郎次惇左侍禁次忤未仕次恪亦皆左侍禁次恢衢州江山簿次忻未仕次恠滑州胙城尉次谨未仕次慥太庙斋郎次价假承务郎次愉次怀尚幼女十一人长适宗室观察使世覃次适朝请郎龐元中次适奉议郎梁子雅次适宗室防御使仲戡早卒次适宗室防御使仲汾早卒次适朝奉郎李译次适宗室团练使叔盎次适宗室右监门卫将军仲珣早卒次适文思副使赵令昔次适宗室率府率仲扩次幼未适内外诸孙几百人可谓盛矣以是年九月六日葬於开封府祥符县祖塋之别域礼也铭曰

子以母成母以子荣教笃忠孝天锡壽终岁月惟良掩於佳城

故庐江田府君夫人赵氏墓志铭

夫人其先南阳人五代之末家於濡须祖讳某倜傥有才智轻财好士搢绅乐与之游尝设方略擒巨盗闾里以安朝廷旌其能诏列仕版辞不愿就乃以保信军节度行军司马老於家考讳化成举进士不第乡党以为令族夫人饬身有法度事亲笃孝爱妇德充备慎择良配长而归於庐江田府君讳某府君博学修己皇佑中诏下郡国荐士无为以府君首冠贤能书长者

之车日盈其门延接施与人慕其风夫人盖有助焉事奉舅姑尽礼事继姑益孝谨内外称贤田氏大姓也其岁时祭祀婚姻礼币宾客之奉伏腊之给皆有家法义居甚久人无间言亲族邻里有疾病急难必力以济平居不妄语言所为循理内外称之其为德可知矣子二人曰瓌重信义喜宾客不幸早世曰仔补上庠生有行艺女一人适乡贡进士李从道孙几人曰某曰某曰某皆举进士孙女几人未嫁以某年某月某日终於家享年七十有几卜某年某月某日葬於某乡某原府君之莹礼也先妣长寿县君夫人之堂姊也某仲妹夫人之冢妇也熙宁初某自黄梅令被召为礼官侍长寿过庐江见姨妇姑三世子孙满前上下肃雍悦悻情话旬日不忍别泊元丰初衔哀过姨家是时姨服姑丧拜於堂不胜其悲姨今亡矣可胜痛哉襄事有日仔来求铭时被命典客道由淮楚故里在望不得执紼以申其哀愴乃为铭曰

赵氏淑女田氏贤妇孝事舅姑如事父母萃以为荐兰以为佩祖先享之庆福是赉陟彼淮南望潜邑潜不可及雪涕以泣

故钱夫人墓志铭

夫人钱氏其先钱塘人尚父吴越王之族年始笄而归於吾友潘延之兴嗣延之有道之士也得官不赴退居鍾陵三十年朝廷闻之召命再至固辞以母老不愿仕夫人实同其志而无向荣之慕不强夫以仕此其所难也夫人性安恬事姑尽妇道教子有法度内外称其贤因读佛书默然有解熙宁五年九月十日坐上得疾顷刻而逝年四十有七生男子二人长曰昂前任某官仲曰羣举进士预天府贡女子四人长适进士王深之次适国子博士张知古次适某州司户参军赵峒一未许嫁以六年夏四月某日卜葬於西山某原昂羣其书走仆来求铭余与延之有通家之好义不得辞铭曰事姑以孝鞠幼以慈生死之际脱然不疑为有道者之妻非夫人而谁

故王夫人墓志铭

夫人王氏讳和其先深之饶阳人赠太师中书令兼尚书令魏国公諡惠献讳化基之孙给事中天章阁待制讳举元之女自惠献公参预国政始徙家京师後为开封人夫人柔慧令淑女功妇道莫不纯备父母慎择名族良士以为之配年十有九归于今奉议郎赵君君章事舅姑尽礼闺门肃雍内外亲族称以为法生一女子三岁而夭嘉佑二年舅驾部郎中守郢州夫人感疾卒於郢之官舍享年二十有一元佑元年冬十月葬於洛阳以祔先姑礼也铭曰

呜呼夫人肃雍贤孝归於士夫宜寿而夭洛阳之原以卜吉兆篆刻铭章懿德永耀

故朝奉郎知汝州黄府君行状

府君讳某字任道其先江夏人遭唐末之乱其族分适江南西蜀惟建安浦城为着姓虽爵位无显而其文章行义多见称於时曾祖元吉初以风雅名重江南仕非其志儒学传家二子入本朝皆登进士第次子觉任殿中丞以清直闻当时儒宗如宋宣献杨刘二内相多与唱酬摺

绅传之君之祖也考潜山先生两举进士不利於春官朝廷当推恩奏名而隐居求志不愿就其歌咏翰墨有晋唐风格累赠朝奉郎世积令德笃生府君府君为儿童时才识已过人及其长力学有文行为韩魏公王荆公欧阳公深所器重皇佑五年进士及第调扬州天长主簿移恩州清河令秩满改着作佐郎知曹州济阴县神宗皇帝登极覃恩迁秘书丞以广济河决免一官魏公留守魏都荐君学行乞教授北京国子将命下丁潜山先生忧继丁母裴氏寿安县太君忧执丧尽礼兄弟友爱闺门肃雍士君子推以为法制终再授秘书丞监都进奏院召对除河北东路提举常平仓就改本路转运判官旋易西路就移陕府西路提点秦凤等路刑狱被召赴阙未行坐举官失当再夺秘书丞会更官制授奉议郎入尚书省任职方员外郎车驾幸省迁承议郎改三品服久之以廩稍不足乞补外乃知汝州今天子即位恩迁朝奉郎苦足疾求致仕元丰八年十二月四日卒於官舍享年六十有五先是一夕梦白鷄栖於牀下语家人曰昔谢安梦白鷄而死我以辛酉岁生岂吉祥耶果不起其疾娶某氏追封永安县君再娶章氏封武宁县君三子曰材太庙斋郎曰枢曰杞皆郊社斋郎二女长适奉议郎王续次在室恩州之清河清阳欠黄河芟草扫岸十四万两县於队长十九户下催理都水漕台文移不絕十九户贫乏六年不能供前後长少鞭扑不胜数尽当时队长以丁数选非以物产定故尔郡县苦之人莫敢议君乃言於朝曰嘉佑之初河入恩州故埽岸芟草出於民者万数今则聚而无用条其可免之十利朝廷可其奏悉蠲之魏公方执政尤称其事初朝廷置宽恤民力司诸道遣使求民瘼有曰河朔馆驿宜罢须索以宽其役君以谓河北中路传驿岁有遽使往来边防休戚之所系百须皆出於民当令百姓明具所出物数折除春夫丁役及於二税合纳之物量数放免民自乐输矣朝廷从其议至今民以为利君在济陰当广济河决危急邑人将就垫溺老幼号诉君采輿议乃决南堤以分水势不意浸邻田论法至重君自以长不忍贻過於下一皆引伏当时魏公吴正宪公御史中丞交章论列以为诚心爱民非有害彼之意譬如逐盗出境盗为他境之害非逐盗者之罪也曹州定陶知县张复礼亦乞纳官以赎其罪竟得未减而济陰之民世世不忘其德至神宗朝召对上曰卿即某耶昔日济陰之事意在恤民慰劳之甚厚君称谢因请上留意史书上悦听纳时贵人有不喜君者君为提举官时郡县多不晓朝廷爱民之意过为苛刻君务为便民司农官以为沮法赖正宪辨明得免斥逐君议赈济之术均以一路当散粮斛之数随郡县丰凶户口多寡增损以给民全活者衆矣河北方水灾米粟踊贵市易余官又增价以敛之民益艰食人不敢言君曰视民困苦而不救非我志也遂奏罢之凤州有狱久不决而苦愆亢君亲往决之是夕雨泽沾足人以为雨自公致也君孝於事亲友爱诸弟自少文学声名藹於士林识度高远议论严正耻为阿谀取悦於人其文章翰墨为世推重文集四十卷可见其志也其为守令奉使惟务爱民以报朝廷大臣屡荐以台阁侍从而其命数奇士论惜之平生恺悌与朋友交久而益固未尝遽言人短而多称扬人之所长勇於信义廉於进取毅然有古人之风某久游门下知行义为最详纪述善美不敢以诬谨状宗室金紫光禄大夫检校太子宾客右武卫大将军秀州团练使赠郢州观察使追封东平侯赵公行状

曾祖讳惟忠彰化军节度使舒国公祖讳从谨宣州观察使宣城侯

父讳世崇洺州防御使

公讳令蟪字景珍皇佑元年八月生於邸第二年四月仁宗赐名授右内率府副率明堂覃恩改左内率府率嘉佑五年改右千牛卫将军八年英宗即位覃恩改左监门卫大将军治平四年先帝即位改右武卫大将军使持节濠州诸军事濠州刺史熙宁十年改左武卫大将军使持节秀州诸军事秀州刺史充本州团练使其散官勲封食邑累加至金紫光禄大夫检校太子宾客兼御史大夫上柱国天水郡开国公食邑三千户食实封三百户元丰五年八月某日以讞闻赠郢州观察使追封东平侯八年三月先帝登遐诏举葬於西京永安县某原礼也公四岁而孤天资信厚出就外傅日诵千言诸父兄以成人期之及长博覽载籍尤专诗书通知风教之本间为篇章歌咏皇化有文集三卷传於家每与人接则谦和雍容非礼义不道故始终无悔吝人有急难则赙之凡亲戚中议论有所未决者多质於公其为人信重如此其事尊亲以孝称母福昌夫人疾寢不解衣药必躬尝晨昏不敢违去左右及夫人丧号慕过哀遂致危困捐馆之日召诸子立於前以告之曰吾幸生宗室蒙赖累朝德泽保奉先人祭祀至於今日不幸不得见汝等长立岂非修短有数耶吾平生无玩好唯翰墨简册而已吾死当陈设翰墨简册於前足矣母以华靡为尚因索飞白笔书清白风月四字乃云此可以传示子孙乃奄然而逝年三十有五娶陈氏封乐寿县君子男六人长曰子颯右内率府副率次不育次子沆次子沆并三班奉职次子沆子?未仕女四人长适镇戎军判官柳槩余未嫁呜呼公乎太祖皇帝之六世孙中书令吴懿王之元孙舒国公之曾孙宣城侯之孙洺州防御使之子承派天潢生长宗邸其势岂不贵且重哉而能不骄不侈尊贤乐善存心经史敦行孝悌内为亲族所爱外为搢绅所称可谓贤公子矣而其壽不及中闻者哀之敢书其实以告有司谨状

故左藏库使银青光禄大夫检校太子宾客兼御史大夫始平郡开国公冯侯墓表

冯侯讳文显字晦之太尉諡勤威鲁国公之子也鲁国公仕太宗真宗两朝有勲绩书於史册在师旅不忘经术而以义方传其家侯年十一岁而孤执丧如成人每侍公画像号泣过哀其孝爱盖出於天性是时家多赐金伯氏将均之侯辄不顾以书劒自与人问其故侯曰此先君所以起吾家非它资所可拟也识者奇之初以父任为右班殿直累迁至左藏库使银青光禄大夫检校太子宾客兼御史大夫骑都尉始平郡开国公食邑二千户历任监中牟仓定州监酒税京师南作坊唐州陈州巡检曹州润州滑州都监江宁府驻泊真定府路分都监江东路京西路提点刑狱府界提点诸县公事湖北路益利路兵马钤辖知莫州澧州广信军忻州鄜州所至以廉能称而事有条理其听讼详明吏畏民爱於今称之守鄜一年遽以闲局为请得嵩山崇福宫任满朝廷除知陇州辞不赴再乞闲局乃管句中岳庙未几乞致仕得谢元丰三年冬十有二月某日终於家享年七十有一以某年某月某日葬於开封府某县之原祔鲁公之茔礼也侯之系出施为已详见於宣德郎张君舜民所撰墓志铭矣而其子惟寅又得侯之遗事於耆旧考之有实乃属予表之云侯在中牟时金水河决其势危急太守委侯救护中夜承命即时驰白县令启关令不之许侯曰我宁得罪民事不可缓也乃发关而出质明堤为之固於是民免垫溺之患侯之敢为如此侯在益利路时方与客饮酒或告军中有变乃呼出密问之云其事如此与侯共事者欲潜出侦之侯曰吾军中无足虑者第饮酒以安人心已而果妄或请深治告者侯曰庸人无知不足深治恐来者惧而不敢言他侯之识虑如此任安惠公守曹南?下严肃待侯最厚一日谓曰闻某人犯法吾欲劾治未得其实烦君伺之侯曰举善罚罪太守之职也属吏何与焉岂惟不敢闻命亦恐上累公之德任公握手谢曰老夫过矣老夫

过矣侯之谨厚如此鄜有盗羊杀人者案具将就刑侯初至郡疑其不实乃易狱吏而讯之云我实非盗也偶见牧羊儿死仆地驰告里长故执我又指羊羣中一羊以为我所盗者我知无以自辨敢不服罪侯察其非辜令释去不数日旁县获盗羊杀人者抵罪侯之明断如此昔太尉鲁公尝开国於始平至是侯实继之克承厥家世济其美大丞相王荆公为撰鲁公神道碑云刻碑墓门公实有子盖有自矣侯之孝爱出於天性又其廉能敢为谨厚识虑明断皆可书也作冯侯墓表

廉君四行述

君讳惟德字天辅以慕尚贤者教育子弟为乐有某氏为盗而去後虽得其实而以盗有老母故不白於公及盗败而自陈人始知之尝出遇兼金於道委之而去其主反得之生平好行惠而不图其报此山阳之人所共称也余既得其实故述之云

子弟庠校训毓仁孝维君之教夜盗之去得实勿愬维君之恕道金且兼勿拾而贪维君之廉有行其惠勿心其利维君之施教兮恕兮廉兮施兮乡党所推予而既闻嗟不识君述之以文

无为集卷十四

卷十五

钦定四库全书

无为集卷十五 宋 杨杰 撰

奏议

奏请四皇后庙升祔状

右臣先曾上言伏为皇后庙四室第一室孝惠皇后贺氏第二室孝章皇后宋氏第三室淑德皇后尹氏第四室章怀皇后潘氏孝惠皇后太祖首纳之后也淑德皇后太宗首纳之后也章怀皇后真宗首纳之后也并遇初潜殡於帝室正位乎内王化所基生享礼封後行追册孝章皇后在太祖之朝已母仪天下及太宗即位号曰开宝皇后以上四后顺德徽音见於彤史奉安别庙荐享有常升祔之仪久而未讲每遇禘祫则迁神主设席於太庙本位帝主后主之次虽云合食其实异牢礼意人情有所未尽或者以谓孝惠淑德章怀三后生无尊称没加盛礼难以升祔太庙臣谨按国朝会要礼阁新编所载懿德皇后符氏开宝八年崩亦在太宗登极之前至太平兴国三年方行追册今已升祔太宗庙室况又孝章皇后在太祖之朝已正中壺而母仪天下乎伏请比用懿德皇后礼例升孝惠皇后孝章皇后祔於太祖皇帝庙室升章怀皇后祔於真宗皇帝庙室所贵严升配正始人伦推广孝思风化天下奏入已久未蒙付外施行今伏见慈圣光献太皇太后上僊山陵有日陛下以嫡孙号慕过哀外示易月之文而实遵三年之制谓园陵有所谦抑故隆以因山谓謚法未足形容故增以四字权宜祥禫之服却而不御公卿羣臣表章七上而始得瞻望更朝又表章五上然後勉从正殿之请每降手诏发扬太皇太后仁圣功业莫不出於至诚感动天地自载籍以来天子孝德未有过今日也将来九虞礼毕则崇配於仁宗庙室臣愚不避诛殛再敢上洩天听伏乞陛下扩充不匮之心等而上之至於祖宗后庙因慈圣光献崇配之日升孝惠孝章淑德章怀四后神主祔於太祖太宗真宗祔室断天下之大疑正宗庙之大法以垂永久不胜至愿其升祔昭穆准淳化元年勅宜依旧懿德皇后在淑德皇后之上又咸平三年勅孝章皇后宜在孝惠皇后之下又祥符五年勅禘祫之日孝惠孝章淑德三皇后神主祔飨於太祖太宗本室次於正室又祥符六年言者请以元德皇后神主升祔在懿德皇后之上真宗诏曰载念尊亲盖惟极致在乎陟降非敢措辞惟以祔庙之岁时用为合享之次序宜恭以元德皇后神主祔於明德皇后之次至庆历元年言者请以章懿皇后序於章穆章献皇后之上仁宗诏曰祇览祥符之诏深原文考之旨极意尊亲之际重形陟降之辞故以祔庙之岁时用为合享之次序义无差别情无重轻恭依礼官所议奉章献皇后章懿皇后序於章穆之次是致庆历祀仪凡行禘祫皇后庙神主并设席於太庙本位帝主后主之次永万世不易之典也如蒙允臣所请其升祔昭穆即乞依三朝诏旨及庆历祀仪熙宁祀仪施行谨具奏闻伏候勅旨

禘祫合正位序议

右本院先准中书劄子奉圣旨修定太庙祀仪续准近制奉僖祖为太庙始祖所有禘祫神主合正位序检会禘祫旧仪於殿室外设昭穆之位僖祖翼祖太祖太宗仁宗及诸室后主共十四位俱南向顺祖宣祖真宗英宗及诸室后主共十位俱北向所有礼乐之器多陈设於堂之上下而皆在北向神主之後质之典礼参以人情窃恐未顺谨按礼记周礼经传及尔雅通典禘祫志三礼义宗所载禘祫昭穆盖有室中堂上之别古者宗庙异宫各有堂室户近东祔主在西其在始祖后稷庙室则后稷东向其为昭者皆南向其为穆者皆北向在太祖文王庙室文王东向以率先王之穆穆皆北向在太宗武王庙室则武王东向以率先王之昭昭皆南向各就其室裸酌馈献此所谓室中之位也及其迎之出户射牲燔燎朝事朝践则后稷文王武王皆南向先王先公其为昭者皆西向其为穆者皆东向此所谓堂上之位也遇祫祭则先王先公合食於后稷之庙

明堂配上帝议

谨按周礼掌次职曰王大旅上帝则张毡案祀五帝则设大次小次又司服职曰祀昊天上帝则服大裘而冕祀五帝亦如之明上帝与五帝异矣则孝经所谓宗祀文王於明堂以配上帝者非可兼五帝也考之易诗书所称上帝非一易曰先王作乐崇德殷荐之上帝以配祖考诗曰昭事上帝聿怀多福又曰上帝是祗书曰以昭受上帝天其申命又曰惟皇上帝降衷於下民如此类者岂可皆以五帝而言之自郑氏之学兴乃有六天之说而事非经见至晋泰始初论者始以为非遂於明堂惟设昊天上帝一坐而已唐显庆礼亦止祀昊天上帝於明堂今大飨在近议者犹以为上帝可以及五帝臣等请如圣诏祀英宗皇帝於明堂惟以配上帝至诚精禋以称皇帝严父之意

奏请罢文德殿常朝官状

儒林郎守秘书省著作佐郎充太常礼院主簿臣杨某奏谨按周礼宰夫掌治朝之法以正王及三公六卿大夫羣吏之位王眡治朝则太宰赞听治又按礼记曰视朝於内朝臣辨色始入内朝及路寝门之外朝羣臣治事王者日於此以听视之故亦谓之治朝也唐六典曰凡京师文武职事九品以上听每朔望朝参五品以上及供奉官员外郎监察御史太常博士每日参谓之常参官斯皆文武之有职事趋於朝天子御宣政或御紫宸以视朝听治盖沿周制也其无听职事则无常参班次故会要所载如本官不是常参官并宪官是摄者惟听於御史班中辞见乃知辞见之日即入朝自余不入朝矣今乘輿常日御紫宸或御垂拱见内朝之臣听天下之治遵用周唐故事无不协於典礼而其文德殿常朝官考之载籍似未为得於周则非公卿大夫羣吏治事者之比於唐则异京师文武职事之官窃闻其间多是待次之人久在旅琐日趋阙廷劳乏可惻加之累岁以来常候宰臣奏事退赴押班或遇辰正牌上方得放班近者伏闻德音令今後御史台候垂拱殿坐即一面放班中外相传莫不称颂向非陛下至仁盛德矜察微隐何以及此以臣愚见其文德殿常朝官在京未有职事於礼可免常参伏乞朝廷特与放罢或祇令赴朔望起居其贺谢辞见及京司百官五日一赴起居者自依定制如此则於周唐旧仪两以为得臣虽贱愚备员礼局有所闻见不敢不言谨具状奏闻伏候勅旨

上辛祈谷议

谨按月令孟春之月是月也天子乃以元日祈谷於上帝注谓以上辛郊祭天也公羊曰郊用正月上辛注三王之郊一用夏正言正月者春秋之制也正月岁首上辛犹始新皆取其首先之意又谷梁曰我以十二月下辛卜正月上辛又左氏曰啓蛰而郊注啓蛰夏正建寅之月也陆淳曰启蛰为建寅之月百蛰惊出尔略举时候非必取历惊蛰之节也此盖用正月上旬辛日以祈谷即不系立春节气之前後假令十二月中旬下旬立春因择辛而祈谷则是用中辛下辛即非元日之义本部今参详合依天禧元年勅旨上辛不拘立春先後所有王少卿所议及天禧以来太史所定上辛之日委得允当太常所议立春後祈谷难以依从

奏请太庙殿上钟磬状

右臣伏闻声音之道与政通堂上之乐所以象宗庙朝廷之治堂下之乐所以象万物之治堂上堂下用乐虽殊八音克谐各不可阙其实一也今太庙之乐堂下具八音万物之治可谓周矣堂上之乐则阙钟磬在宗庙朝廷之治八音有所未备焉臣职在礼乐不敢不言谨按礼曰钟声铿铿以立号诗曰既和且平依我磬声是知乐之号令自钟声而立乐之和平依乎磬声则钟磬安可阙哉臣昨蒙睿旨提辖修制朝会殿上玉磬曾於去年具奏乞依虞书戛击鸣球之义候玉磬成日先用之於太庙殿上以称陛下稽古奉先之志寻蒙付外未奉朝旨施行今虽玉磬未成伏遇春阳发生之时太庙孟享之日欲乞出自圣断依古复用殿上钟磬所贵发扬至音号令衆乐以格祖考以致和平上自朝廷下及万物咸被福佑臣某不胜大愿谨具状奏闻伏候勅旨元丰八年正月二十五日

堂上钟磬议

一准中书劄子节文详定郊庙礼文所详定伏请每遇亲祠宗庙歌者在堂更不兼设钟磬宫架在庭更不兼设琴瑟匏竹更不寘之於牀其郊坛上下之乐亦乞依此正之有司摄事准此谨按虞书曰戛击鸣球搏拊琴瑟以咏此有虞堂上之乐也下管鼗鼓合止祝敔笙镛以间箫韶九成击石拊石此有虞堂下之乐也正义曰球为玉磬商颂云依我磬声亦玉磬也大射礼钟磬在庭今鸣球於庙堂之上者按郊特牲云歌者在上帝人声也左传曰歌钟二肆则堂上有钟明磬亦在堂上故汉魏以来登歌皆有钟磬燕礼无钟磬者诸侯乐不备也是知堂上象朝廷之治堂下象万物之治堂上堂下八音各备而互见之不可阙也又按礼曰升歌清庙诗序清庙祀文王此有周堂上之歌也大司乐路鼓路鼗阴竹之管龙门之琴瑟九德之歌九之舞於宗庙之中奏之若乐九变则人鬼可得而礼矣此有周庙中降神之乐也降神之乐既有献以琴瑟则宫架内琴瑟不可去矣所有祀郊及有司摄事伏乞坛殿之上依旧设钟磬其宫架下降神之乐亦乞依旧设琴瑟其匏竹不寘於牀即乞依礼文所奏请

上言大乐七事

一曰歌不永言声不依永律不和声

谨按虞书曰诗言志歌永言声依永律和声八音克谐无相夺伦神人以和盖歌以永诗之言五声以依歌之咏阳律阴吕以和其声金石丝竹匏土革木八音克谐无相夺伦然後神人以和也若夫歌不永言声不依永律不和声八音不谐而更相夺则神人安得和哉且金声春容失之则重石声温润失之则轻土声函胡失之则下竹声清越失之则高丝声纖微失之则细革声隆大失之则洪匏声丛聚失之则长木声无余失之则短惟人禀中和之气而有中和之声足以权量八音使无重轻高下洪细长短之失故古者升歌贵人声八音律吕皆以人声歌为度以一声歌一言言虽永不可以逾其声【如大善曲肃肃艺祖一句以仲南黄仲四声歌之声律最为和协】今夫歌者或咏一言而滥及数律【如正安曲至神感神夷黄一字兼四声】或章句已阕而乐声未终【如正安曲已终尚有黄无夷夹大五声之类】兹所谓歌不永言也伏请节裁烦声以一声歌一言遵用永言之法且诗言人志咏以为歌五声随歌故曰依永律吕协奏故曰和声先儒云依人音而制乐托乐器以写音乐本效人非人效乐此之谓也今祭祀乐章并随月律声不依咏以咏依声律不和声以声和律非古制也伏请详定使乐以歌为本律必和声也

二曰八音不谐钟磬箫箫四清声事

谨按虞书曰箫韶九成凤凰来仪盖虞乐之成以箫为主也商颂曰既和且平依我磬声盖商乐和平以磬为依也周官钟师掌金奏凡乐事以钟鼓奏九夏盖周乐合奏以金为首也是钟磬箫者衆乐之所宗为圣帝明王之所贵数十有六其所由来尚矣汉得古磬十六於犍为郡郑氏注周礼编钟编磬及大周正乐三礼图编钟编磬箫并以十六为数示天子之乐用八钟磬箫倍之以为十六矣且十二者律之本声也四者律之应声也本声重浊应声轻清本声为君父应声为臣子故其四声或曰清声又曰子声也自景佑中李照议乐以来钟磬箫始不用四声是有本而无应有倡而无和者四十余年矣八音何从而谐耶今巢笙其管皆十有九以十二管发律吕之本声以七管为律吕之应声用之已久而声至和协伏请参考古制依巢笙例用编钟编磬箫之四子声以谐八音

三曰金石夺伦事

谨按大司乐文之以五声播之以八音八音虽异其所以应律则一也故乐奏一声诸器皆以其声应也既不可以不及又不可以有余八音克谐无相夺伦此之谓也今大乐之作琴瑟埙簫笛箫笙管箏筑奏一声则鐃钟特磬编钟编磬连击三声戾於衆乐中声最烦数而掩压衆器求其所谓无相夺伦不亦难哉伏请详定大乐其鐃钟特磬编钟编磬并依衆器节奏不可连击三声所贵八音无相夺伦

四曰舞不象成

谨按乐记曰夫乐象成者也摠干而山立武王之事也发扬蹈厉太公之志也武乱皆坐周召之治也又曰武始而北出再成而灭商三成而南四成而南国是疆五成而分周公左召公右六成复缀以崇天子是大武之舞象周德之成矣国朝以谦德受禅郊庙之乐先奏文舞次奏

武舞其於武舞也容节六变一变象六师初举所向宜北矣二变象上党克平所向宜北矣三变象维扬底定所向宜东南矣四变象荆湖来归所向宜南矣五变象邛蜀纳款所向宜西矣六变象兵还振旅所向宜北而南矣今夫舞者非止发扬蹈厉进退俯仰不称成功盛德差失其所向而又文舞容节殊无法度故曰舞不象成也伏乞考乐记象成之文详定二舞容节及改正所向以称成功盛德

五曰乐失节奏

谨按孔子语鲁太师乐其可知也始作翕如也从之纯如也皦如也绎如也以成始作翕如也始作翕然如衆羽之合从之纯纯如也节奏明白皦如也绎如其绪之不穷也夫然後成今大乐之作声不齐一节奏混殽往来无叙曷闻所谓翕如纯如皦如绎如者乎伏请稽考孔子之言详定大乐节奏

六曰祭祀享无分乐之序

谨按大司乐乃分乐而序之以祭以享以祀乃奏黄钟歌大吕舞云门以祀天神乃奏太簇歌应钟舞咸池以祭地示乃奏姑洗歌南吕舞大磬以祀四望乃奏蕤宾歌函钟舞大夏以祭山川乃奏夷则歌小吕舞大濩以享先妣乃奏无射歌夹钟舞大武以享先祖夫金石衆作之谓奏咏以人声之谓歌阳律必奏阴吕必歌阴阳之合也顺阴阳之合所以交神明致精意也今冬至祀天不歌大吕夏至祭地不歌太簇春享祖庙不奏无射秋享后庙不歌小吕既不能奏律歌吕顺阴阳之合以格上神而又无专祀四望山川用乐之制则何以赞导宣发阴阳之气而生成万物哉故曰祭祀享无分乐之序也伏请依周礼分乐之序以奉祠事

七曰郑声乱雅

谨按孔子曰恶紫之夺朱恶郑声之乱雅乐然朱紫有色而易别雅郑无象而难知圣人惧其难知也故定律吕中正之音以示万世扬雄曰中正则雅多哇则郑又曰黄钟以生之中正以平之确乎郑卫不能入也今雅乐古器非不存也太常律吕非不备也而学士大夫置而不讲考击奏作委之贱工如之何不使雅郑之杂耶伏请审调太常钟琯依典礼用十二律还宫均法令上下晓知十二律音则郑声无由乱於雅也今着大乐十二均图一卷备载律吕宫调又各取本宫乐章一首附於篇以图考声则雅郑昭然别矣

右元丰二年八月一日上言二日宣取大乐十二均图并序上进至三年八月十五日中书门下进呈奉圣旨送议乐刘几等据几等奏若依杨杰所请其大乐律吕委得和谐伏候勅旨九月十五日奉圣旨依奏

申明诬告官员罪犯

具位臣杨本司近准淮南转运司牒勘断润州百姓翟忠盛因分擘伯父翟日荣家财累经官

司依公勘证其人辄更罔昧朝廷进状指论官司干谤台省行遣不当致烦朝旨下淮南路勘鞫委不合再分伯父财产又检会昨有秀州华亭县户陆华经省部诬告本县知县承议郎陶熔取受捕鱼人等银钱仅千余贯又有常州裴宗元止因争理姓产於进状诬毁本路转运副使孙昌龄曾有干涉行遣不公其妄陈词之人各已引用赦恩原罪窃谓此风不宜滋长须至申请者

右臣勘会人户理诉公事已经州县依公定勘结絶其间却有顽狡之人隐匿情犯别经监司台省或诣朝廷陈状事涉诬谤或称所勘官员受赃请托行遣不公欲得信凭受理自知虚妄即多近大礼年分或於大寒盛暑之际指望在京非次恩宥欲其幸免诬告之罪前後兴起大狱禁系良民不少兼又被论之官未显虚实若稍涉嫌疑须当权移差遣或申奏朝廷令先罢职事伺候辩对动经岁月方得了当其被告官员若果如所论即系入已赃遇赦不该原得罪非轻或虽无赃贿稍涉用情亦当终身废黜泊至勘证委无赃私其诬告之人应得反坐之罪又却该赦全原遂致豪猾奸恶之人教唆鼓扇自谓得计官司易以摇动公然诬告无所畏惮至有廉吏遭此谤毁远近传闻难以自明虽不获罪而阴?清议暧昧不申有伤风教臣今起请欲乞今後应有词讼指论当职官员取受钱物受人请嘱行遣不公等事约法合得免官除名不原赦之罪者如勘证得委是诬告即下状并借词之人断本罪外亦乞申取朝廷指挥量情轻重编管刺配或遇赦宥亦乞特不以赦原所贵狡狴顽恶之徒稍有畏惮不敢辄以虚诈干台省诬罔监司州县承勘官员谨録奏闻伏乞朝廷特赐详酌指挥下刑部立法施行

无为集卷十五